

欽定魏書

卷五
之八

魏書卷五

齊

魏

收

撰

帝紀第五

高宗紀

高宗文成皇帝諱濬恭宗景穆皇帝之長子也母曰閭氏真君元年六月生於東宮帝少聰達世祖愛之常置左右號世嫡皇孫年五歲世祖北巡帝從在後逢虜帥桎一奴欲加其罰帝謂之曰奴今遭我汝宜釋之帥奉命解縛世祖聞之曰此兒雖小欲以天子自處意奇之既長風格異常每有大政常參決可否正平二年十月

戊申卽皇帝位於永安前殿大赦改年

興安元年冬十月以驃騎大將軍元壽樂爲太宰都督
中外諸軍事錄尚書事尚書長孫渴侯爲尚書令加儀
同三司十有一月丙子二人爭權並賜死癸未廣陽王
建薨臨淮王譚薨甲申皇妣薨太尉張黎司徒古弼以
議不合旨黜爲外都大官平南將軍宋子侯周怵進爵
樂陵王南部尚書章安子陸麗爲平原王文武各加位
一等壬寅追尊景穆太子爲景穆皇帝皇妣爲恭皇后
尊保母常氏爲保太后隴西屠各王景文叛詔統萬鎮
將南陽王惠壽討平之十有二月戊申祔葬恭皇后於

金陵乙卯初復佛法丁巳以樂陵王周怵爲太尉平原王陸麗爲司徒鎮西將軍杜元寶爲司空保達沙獵國各遣使朝獻戊寅建業公陸俟進爵東平王廣平公杜遺進爵爲王癸亥詔以營州蝗開倉賑恤甲子太尉樂陵王周怵有罪賜死濮陽公閻若文進爵爲王

二年春正月辛巳司空杜元寶進爵京兆王廣平王杜遺薨尚書僕射東安公劉尼進爵爲王封建寧王崇子麗爲濟南王癸未詔與民雜調十五丙戌尚書西平公源賀進爵爲王二月己未司空京兆王杜元寶謀反伏誅建寧王崇崇子濟南王麗爲元寶所引各賜死乙丑

發京師五千人穿天淵池是月劉義隆子劭殺其父而自立三月壬午尊保太后爲皇太后安豐公闔虎皮進爵爲河間王乙未疏勒國遣使朝獻夏五月乙酉行幸崞山辛卯還宮是月劉劭弟駿殺劭而自立閏月乙亥太皇太后赫連氏崩秋七月辛亥行幸陰山濮陽王闔若文征西大將軍永昌王仁謀反乙丑賜仁死於長安若文伏誅己巳車駕還宮是月築馬射臺於南郊八月辛未渴槃隨國遣使朝貢戊戌詔曰朕以眇身纂承太業懼不能宣慈惠和寧濟方寓夙夜兢兢若臨淵谷然卽位以來百姓晏安風雨順序邊方無事衆瑞兼呈不

可稱數又於苑內獲方寸玉印其文曰子孫長壽羣公
卿士咸曰休哉豈朕一人克臻斯應實由天地祖宗降
祐之所致也思與兆庶共茲嘉慶其令民大酺三日諸
殊死已下各降罪一等九月壬子閱武於南郊冬十有
一月辛酉行幸信都中山觀察風俗十有二月誅河間
鄭民爲賊盜者男年十五以下爲生口班賜從臣各有
差甲午車駕還宮庫莫奚契丹蜀賓等十餘國各遣使
朝貢復北平公長孫敷王爵

興光元年春正月乙丑以侍中河南公伊戾爲司空二
月甲午帝至道壇登受圖籙禮畢曲赦京師班賞各有

差夏六月丙寅行幸陰山秋七月庚子皇子弘生辛丑
大赦改年八月甲戌趙王深薨乙亥車駕還宮己丑皇
叔虎頭龍頭薨九月庚申庫莫奚國獻名馬有一角狀
如麟是月閉都城門大索三日獲姦人亡命數百人冬
十有一月北鎮將房杖擊蠕蠕虜其將豆渾與句等獲
馬千餘匹戊戌行幸中山遂幸信都十有二月丙子還
幸靈丘至溫泉宮庚辰車駕還宮出于叱萬單國各遣
使朝獻

太安元年春正月辛酉奉世祖恭宗神主于太廟車騎
大將軍樂平王拔有罪賜死二月癸未武昌王提薨三

月己亥詔曰今始奉世祖恭宗神主于太廟又於西苑
遍秩羣神朕以大慶饗賜百寮而犯罪之人獨卽刑戮
非所以子育羣生矜及衆庶夫聖人之教自近及遠是
以周文刑於寡妻至于兄弟以御家邦化苟從近恩亦
宜然其曲赦京師死囚已下夏六月壬戌詔名皇子曰
弘曲赦京城改年癸酉詔曰夫爲治者因宜以設官舉
賢以任職故上下和平民無怨謗若官非其人姦邪在
位則政教陵遲至於凋薄思明黜陟以隆治道今遣尚
書穆伏真等三十人巡行州郡觀察風俗入其境農不
墾殖田畝多荒則徭役不時廢於力也耆老飯蔬食少

壯無衣褐則聚斂煩數匱於財也閭里空虛民多流散則緩導無方疎於恩也盜賊公行劫奪不息則威禁不設失於刑也衆謗並興大小嗟怨善人隱伏佞邪當途則爲法混淆昏於政也諸如此比黜而戮之善於政者褒而賞之其有阿枉不能自申聽詣使告狀使者檢治若信清能衆所稱美誣告以求直反其罪使者受財斷察不平聽詣公車上訴其不孝父母不順尊長爲吏姦暴及爲盜賊各具以名上其容隱者以所匿之罪罪之是月遮逸國遣使朝貢戊寅帝畋於犢倪山甲申還宮秋七月丙辰行幸河西八月丁亥車駕還宮冬十月波

斯疏勒國並遣使朝貢庚午以遼西公常英爲太宰進爵爲王

二年春正月乙卯立皇后馮氏二月丁巳立皇子弘爲皇太子大赦天下丁零數千家亡匿井陘山聚爲寇盜詔定州刺史許宗之并州刺史乞佛成龍討平之夏六月羽林郎于判元提等謀逆伏誅秋八月甲申畋於河西是月平西將軍漁陽公尉眷北擊伊吾克其城大獲而還九月辛巳河東公閻毗零陵公閻紇並進爵爲王冬十月甲申車駕還宮甲午曲赦京師十有一月尚書西平王源賀改封隴西王嚙唃普嵐國並遣使朝獻劉

駿濮陽太守姜龍駒新平太守楊伯倫各棄郡率吏民
來降

三年春正月壬戌畋於崞山戊辰還宮粟特于闐國各
遣使朝貢徵漁陽公尉眷拜太尉進爵爲王錄尚書事
夏五月庚申畋於松山己巳還宮封皇弟新成爲陽平
王六月癸卯行幸陰山秋八月畋於陰山之北己亥還
宮冬十月將東巡詔太宰常英起行宮於遼西黃山十
有一月蠻王文虎龍率千餘家內附十有二月以州鎮
五蝗民饑使使者開倉以賑之是月于闐扶餘等五十
餘國各遣使朝獻

四年春正月丙午朔初設酒禁乙卯行幸廣甯溫泉宮
遂東巡平州庚午至於遼西黃山宮遊宴數日親對高
年勞問疾苦二月丙子登碣石山觀滄海大饗羣臣於
山下班賞進爵各有差改碣石山爲樂遊山築壇記行
於海濱戊寅南幸信都畋遊於廣川三月丁未觀馬射
於中山所過郡國賜復一年丙辰車駕還宮起太華殿
乙丑東平王陸侯薨夏五月壬戌詔曰朕卽阼至今屢
下寬大之旨蠲除煩苛去諸不急欲令物獲其所人安
其業而牧守百里不能宣揚恩意求欲無厭斷截官物
以入於已使課調懸少而深文極墨委罪於民苟求免

咎曾不改懼國家之制賦役乃輕比年已來雜調減省而所在州郡咸有逋懸非在職之官綏導失所貪穢過度誰使之然自今常調不充民不安業宰民之徒加以死罪申告天下稱朕意焉六月丙申改於松山秋七月庚午行幸河西九月乙巳還宮辛亥太華殿成丙寅饗羣臣大赦天下冬十月甲戌北巡至陰山有故塚毀廢詔曰昔姬文葬枯骨天下歸仁自今有穿毀墳壠者斬之劉駿將殷孝祖脩兩城於清水東詔鎮西將軍天水公封勅文等擊之辛卯車駕次于車輪山累石記行征西將軍皮豹子等三將三萬騎助擊孝祖車駕度漠蠕

蠕絕跡遠遁其別部烏朱賀頽庫世頽率衆來降十有二月征東將軍中山王託真薨

五年春正月己巳朔征西將軍皮豹子略地至高平大破孝祖斬獲五千餘級二月己酉侍中司空河南公伊穢薨三月庚寅曲赦京師死罪已下夏四月乙巳封皇弟子推爲京兆王五月居常國遣使朝獻六月戊申行幸陰山秋八月庚戌遂幸雲中壬戌還宮九月戊辰詔曰夫褒賞必於有功刑罰審於有罪此古今之所同由來之常式牧守莅民侵食百姓以營家業王賦不充雖歲滿去職應計前逋正其刑罪而主者失於督察不加

彈正使有罪者優游獲免無罪者妄受其辜是啓姦邪之路長貪暴之心豈所謂原情處罪以正天下自今諸遷代者仰列在職殿最案制治罪克舉者加之爵寵有愆者肆之刑戮使能否殊貫刑賞不差主者明爲條制以爲常楷儀同三司敦煌公李寶薨冬十有二月戊申詔曰朕承洪業統御羣有思恢政化以濟兆民故薄賦斂以實其財輕徭役以紓其力欲令百姓脩業人不匱乏而六鎮雲中高平二雍秦州徧遇災旱年穀不收其遣開倉廩以賑之有流徙者諭還桑梓欲市糴他界爲關傍郡通其交易之路若典司之官分職不均使上恩

不達於下下民不贍於時加以重罪無有攸縱

和平元年春正月甲子朔大赦改元庚午詔散騎常侍
馮闡使於劉駿二月衛將軍樂安王良督東雍吐京六
壁諸軍西趣河西征西將軍皮豹子等督河西諸軍南
趨石樓以討河西叛胡夏四月戊戌皇太后常氏崩於
壽安宮五月癸酉葬昭太后於廣甯鳴鷄山六月甲午
詔征西大將軍陽平王新成等督統萬高平諸軍出南
道南郡公李惠等督涼州諸軍出北道討吐谷渾什寅
崔浩之誅也史官遂廢至是復置河西叛胡詣長安首
罪遣使者安慰之秋七月乙丑劉駿遣使朝貢壬午行

幸河西八月西征諸軍至西平什寅走保南山九月諸軍濟河追之遇瘴氣多有疫疾乃引軍還獲畜二十餘萬庚午輿駕還宮冬十月居常王獻馴象三十有一月詔散騎侍郎盧度世員外郎朱安興使於劉駿

二年春正月乙酉詔曰刺史牧民爲萬里之表自頃每因發調逼民假貸大商富賈要射時利旬日之間增贏十倍上下通同分以潤屋故編戶之家困於凍餒豪富之門日有兼積爲政之弊莫過於此其一切禁絕犯者十疋以上皆死布告天下咸令知禁二月辛卯行幸中山丙午至於鄴遂幸信都三月劉駿遣使朝貢輿駕所

過皆親對高年問民疾苦詔民年八十以上一子不從
役靈丘南有山高四百餘丈乃詔羣官仰射山峰無能
踰者帝彎弧發矢出山三十餘丈過山南二百二十步
遂刊石勒銘是月發并肆州五千人治河西獵道辛巳
輿駕還宮夏四月乙未侍中征東大將軍河東王閭毗
薨五月癸未詔南部尚書黃盧頭李敷等考課諸州秋
七月戊寅封皇弟小新成爲濟陰王加征東大將軍鎮
平原天賜爲汝陰王加征南大將軍鎮虎牢萬壽爲樂
浪王加征北大將軍鎮和龍洛侯爲廣平王壬午行巡
山北八月戊辰波斯國遣使朝獻丁丑輿駕還宮冬十

月詔假員外散騎常侍游明根員外郎昌邑侯和天德使于劉駿博陵之深澤章武之東州盜殺縣令州軍討平之廣平王洛侯薨

三年春正月壬午以車騎大將軍東郡公乙渾爲太原王癸未樂浪王萬壽薨二月癸酉畋于崳山遂觀漁于旋鴻池三月甲申劉駿遣使朝貢高麗蕤王契噉思厭於師疏勒石那悉居半渴槃隨諸國各遣使朝獻夏六月庚申行幸陰山詔將軍陸真討雍州叛氏仇儻檀等平之秋七月壬寅幸河西九月壬辰征西大將軍常山王素薨冬十月丙辰詔曰朕承洪緒統御萬國垂拱南

面委政羣司欲緝熙治道以致寧一夫三代之隆莫不
崇尚年齒今選舉之官多不以次令班白處後晚進居
先豈所謂彝倫攸敘者也諸曹選補宜各先盡勞舊才
能是月詔員外散騎常侍游明根員外郎昌邑侯和天
德使于劉駿十有一月壬寅輿駕還宮十有二月乙卯
制戰陳之法十有餘條因大儺耀兵有飛龍騰虵魚麗
之變以示威武戊午零陵王閭拔薨

四年春三月乙未賜京師民年七十以上太官厨食以
終其年皇子胡仁薨追封樂陵王乙巳詔曰朕憲章舊
典分職設官欲令敷揚治化緝熙庶績然在職之人皆

蒙顯擢委以事任當厲已竭誠務省徭役使兵民優逸
家給人贍今內外諸司州鎮守宰侵使兵民勞役非一
自今擅有召役逼雇不程皆論同枉法夏四月癸亥上
幸西苑親射虎三頭五月壬辰侍中漁陽王尉眷薨壬
寅行幸陰山秋七月壬午詔曰朕每歲以秋日閑月命
羣官講武平壤所幸之處必立宮壇糜費之功勞損非
一宜仍舊貫何必改作也八月丙寅遂畋于河西詔曰
朕順時畋獵而從官殺獲過度既殫禽獸乖不合圍之
義其勅從官及典圍將校自今已後不聽濫殺其畋獲
皮肉別自頒賚壬申詔曰前以民遭饑寒不自存濟有

賣鬻男女者盡仰還其家或因緣勢力或私行請託共相通容不時檢校令良家子息仍爲奴婢今仰精究不聽取贖有犯加罪若仍不檢還聽其父兄上訴以掠人論九月辛巳車駕還宮冬十月以定相二州霽霜殺稼免民田租是月詔員外散騎常侍游明根驍騎將軍昌邑子婁內近寧朔將軍襄平子李五鱗使于劉駿十有二月辛丑詔曰名位不同禮亦異數所以殊等級示軌儀今喪葬嫁娶大禮未備貴勢豪富越度奢靡非所謂式昭典憲者也有司可爲之條格使貴賤有章上下咸序著之于令壬寅詔曰夫婚姻者人道之始是以夫婦

之義三綱之首禮之重者莫過於斯尊卑高下宜令區別然中代以來貴族之門多不率法或貪利財賄或因緣私好在於苟合無所選擇令貴賤不分巨細同貫塵穢清化虧損人倫將何以宣示典謨垂之來裔今制皇族師傅王公侯伯及士民之家不得與百工伎巧卑姓爲婚犯者加罪

五年春正月丁亥封皇弟雲爲任城王二月詔以州鎮十四去歲蟲水開倉賑恤夏四月癸卯頓丘公李峻進爵爲王閏月戊子帝以旱故減膳責躬是夜澍雨大降五月庚申劉駿死子子業僭立六月丁亥行幸陰山秋

七月辛丑北鎮游軍大破蠕蠕壬寅行幸河西九月辛丑車駕還宮冬十月琅邪王司馬楚之薨十有二月南秦王楊難當薨吐呼羅國遣使朝獻

六年春正月丙申大赦天下三月丁丑行幸樓煩宮高麗蕤王對曼諸國各遣使朝獻三月戊戌相州刺史西平郡王吐谷渾權薨乙巳車駕還宮夏四月破洛那國獻汗血馬普嵐國獻寶劍五月癸卯帝崩于太華殿時年二十六六月丙寅上尊諡曰文成皇帝廟號高宗八月葬雲中之金陵

史臣曰世祖經略四方內頗虛耗既而國費時艱朝野

楚楚高宗與時消息靜以鎮之養威布德懷緝中外自
非機悟深裕矜濟爲心亦何能若此可謂有君人之度
矣

魏書卷五

魏書卷五考證

高宗紀李敷等考課諸州○等北史作業

魏書卷五考證

魏書卷六

齊

魏

收

撰

帝紀第六

顯祖紀

顯祖獻文皇帝諱弘高宗文成皇帝之長子也母曰李貴人興光元年秋七月生於陰山之北太安二年二月立爲皇太子聰叡機悟幼而有濟民神武之規仁孝純至禮敬師友和平六年夏五月甲辰卽皇帝位大赦天下尊皇后曰皇太后車騎大將軍乙渾矯詔殺尚書楊保年平陽公賈愛仁南陽公張天度于禁中戊申侍中

司徒平原王陸麗自湯泉入朝渾又殺之己酉以待中
車騎大將軍乙渾爲太尉錄尚書事東安王劉尼爲司
徒尚書左僕射和其奴爲司空壬子以淮南王他爲鎮
西大將軍儀同三司鎮涼州六月封繁陽侯李嶷爲丹
陽王征東大將軍馮熙爲昌黎王乙丑詔曰夫賦斂煩
則民財匱課調輕則用不足是以十一而稅頌聲作矣
先朝權其輕重以惠百姓朕承洪業上惟祖宗之休命
夙興待旦惟民之恤欲令天下同於逸豫而徭賦不息
將何以塞煩去苛拯濟黎元者哉今兵革不起畜積有
餘諸有雜調一以與民秋七月癸巳大尉乙渾爲丞相

位居諸王上事無大小皆決於渾九月庚子曲赦京師
丙午詔曰先朝以州牧親民宜置良佐故勅有司班九
條之制使前政選吏以待俊乂必謂銓衡允衷朝綱應
敘然牧司寬情不祇憲旨舉非其人愆于典度今制刺
史守宰到官之日仰自舉民望忠信以爲選官不聽前
政共相干冒若簡任失所以罔上論是月劉子業征北
大將軍義陽王劉昶自彭城來降冬十月徵陽平王新
成京兆王子推濟陰王小新成汝陰王天賜任城王雲
入朝是歲劉子業叔父彧殺子業僭立

天安元年春正月己丑朔大赦改年二月庚申丞相太

原王乙渾謀反伏誅乙亥以侍中元孔雀爲濮陽王侍
中陸定國爲東郡王三月庚子以隴西王源賀爲太尉
辛丑高宗文成皇帝神主祔于太廟辛亥帝幸道壇親
受符籙曲赦京師高麗波斯于闐阿曩諸國遣使朝獻
秋七月闕二詔諸有詐取爵位罪特原之削其爵職其
有祖父假爵號貨賂以正名者不聽繼曩諸非勞進超
遷者亦各還初不以實聞者以大不敬論九月劉彧司
州刺史常珍奇以懸瓠內屬己酉初立鄉學郡置博士
二人助教二人學生六十人劉彧徐州刺史薛安都以
彭城內屬彧將張永沈攸之擊安都詔北部尚書尉元

爲鎮南大將軍都督諸軍事鎮東將軍城陽公孔伯恭
爲副出東道救彭城殿中尚書鎮西大將軍西河公元
石都督荆豫南雍州諸軍事給事中京兆侯張窮奇爲
副出西道救懸瓠冬十月曹利彤曷國各遣使朝獻十
有一月壬子劉彧兗州刺史畢衆敬遣使內屬十有二
月己未尉元軍次于柘彧將周凱張永沈攸之相繼退
走皇弟安平薨是歲州鎮十一旱民饑開倉賑恤

皇興元年春正月癸巳尉元大破張永沈攸之於呂梁
東斬首數萬級凍死者甚衆獲劉彧秦州刺史垣恭祖
羽林監沈承伯永攸之單騎走免獲軍資器械不可勝

數劉彧遣使朝貢庚子東平王道符謀反於長安殺副將駙馬都尉萬古真鉅鹿公李恢雍州刺史魚玄明丙午詔司空平昌公和其奴東陽公元丕等討道符丁未道符司馬段太陽攻道符斬之傳首京師道符兄弟皆伏誅閏月以頓丘王李峻爲太宰劉彧青州刺史沈文秀冀州刺史崔道固並遣使請舉州內屬詔平東將軍長孫陵平南將軍廣陵公侯窮奇赴援之二月詔使持節都督諸軍事征南大將軍慕容白曜督騎五萬次於碣磔爲東道後援濟陰王小新成薨高麗庫莫奚具伏弗郁羽陵日連匹黎爾于闐諸國各遣使朝貢劉彧東

平太守申纂戍無鹽逼絕王使詔征南大將軍慕容白
曜督諸軍以討之三月甲寅尅之沈文秀崔道固復叛
歸劉彧白曜回師討之拔彧肥城垣苗麋溝三戍夏四
月白曜攻升城戍主房崇吉遁走秋八月白曜攻歷城
丁酉行幸武州石窟寺戊申皇子宏生大赦改年九
月壬子高麗于闐普嵐粟特國各遣使朝獻丁巳進馮
翊公李白爵梁郡王是月詔賜六鎮貧人布人三匹冬
十月癸卯田於那男池濮陽王孔雀坐怠慢降爵爲公
二年春二月癸未田于西山親射虎豹崔道固及劉彧
梁鄒戍主平原太守劉休賓舉城降是月徐州羣盜司

馬休符自稱晉王將軍尉元討平之三月白曜進圍東陽戊午劉彧遣使朝貢夏四月辛丑以南郡公李惠爲征南大將軍儀同三司都督關右諸軍事雍州刺史進爵爲王高麗庫莫奚契丹具伏弗郁羽陵日連匹黎爾叱六手悉萬丹阿大何羽真侯于闐波斯國各遣使朝獻五月乙卯田于崢山遂幸繁峙辛酉還宮六月庚辰以河南闢地曲赦京師殊死以下以昌黎王馮熙爲太傅秋九月辛亥封皇叔楨爲南安王長壽爲城陽王太洛爲章武王休爲安定王冬十月辛丑上田於冷泉十一月以州鎮二十七水旱開倉賑恤十有二月甲午

詔曰頃張永迷擾敢拒王威暴骨原隰殘廢不少死生
寃痛朕甚愍焉天下民一也可勅郡縣永軍殘廢之士
聽還江南露骸草莽者收瘞之是月悉萬丹等十餘國
各遣使朝貢

三年春正月乙丑東陽潰虜沈文秀戊辰司空平昌公
和其奴薨二月蠕蠕高麗庫莫奚契丹國各遣使朝獻
己卯以上黨公慕容白曜爲都督青齊東徐三州諸軍
事征南大將軍開府儀同三司青州刺史進爵濟南王
夏四月壬辰劉彧遣使朝貢丙申名皇子曰宏大赦天
下丁酉田于崞山五月徙青州民於京師六月辛未立

皇子宏爲皇太子秋七月蠕蠕國遣使朝貢冬十月侍中太宰頓丘王李峻薨十有一月吐谷渾別帥白楊提度汗率戶內附襄城公韓頽進爵爲王

四年春正月詔州鎮十一民饑開倉賑恤二月以東郡王陸定國爲司空高麗庫莫奚契丹各遣使朝獻吐谷渾拾寅不供職貢詔使持節征西大將軍上黨王長孫觀討之廣陽王石侯薨三月丙戌詔曰朕思百姓病苦民多非命明發不寐疚心疾首是以廣集良醫遠採名藥欲以救護兆民可宣告天下民有病者所在官司遣醫就家診視所須藥物任醫量給之夏四月辛丑大赦

天下戊申長孫觀軍至曼頭山大破拾寅拾寅與麾下數百騎宵遁拾寅從弟豆勿來及其渠帥匹婁拔累等率所領降附五月封皇弟長樂爲建昌王六月劉彧遣使朝貢秋八月羣盜入彭城殺鎮將元解愁長史勒兵滅之蠕蠕犯塞九月丙寅輿駕北伐諸將俱會于女水大破虜衆事具蠕蠕傳司徒東安王劉尼坐事免壬申車駕至自北伐飲至策勲告於宗廟冬十月誅濟南王慕容白曜高平公李敷十有一月詔弛山澤之禁十有二月甲辰幸鹿野苑石窟寺陽平王新成薨

五年春三月乙亥詔曰天安以來軍國多務南定徐方

北掃遺虜征戍之人亡竄非一雖罪合刑書每加哀宥然寬政猶水遁逃遂多宜申明典刑以肅姦僞自今諸有逃亡之兵及下代守宰浮游不赴者限六月三十日悉聽歸首不首者論如律詔假員外散騎常侍邢祐使於劉彧夏四月西部勅勒叛詔汝陰王天賜給事中羅雲討之雲爲勅勒所襲殺死者十五六北平王長孫敦薨六月丁未行幸河西秋七月丙寅遂至陰山八月丁亥車駕還宮帝雅薄時務常有遺世之心欲禪位於叔父京兆王子推語在任城王雲傳羣臣固請帝乃止丙午冊命太子曰昔堯舜之禪天下也皆由其子不肖若

丹朱商均能負荷者豈搜揚仄陋而授之哉爾雖沖弱
有君人之表必能恢隆王道以濟兆民今使太保建安
王陸馭太尉源賀持節奉皇帝璽綬致位於爾躬其踐
昇帝位克廣洪業以光祖宗之烈使朕優游履道頤神
養性可不善歟丁未詔曰朕承洪業運屬太平淮岱率
從四海清晏是以希心玄古志存澹泊躬覽萬務則損
頤神之和一日或曠政有淹滯之失但子有天下歸尊
於父父有天下傳之於子今稽協靈運考會羣心爰命
儲宮踐昇大位朕方優遊恭已栖心浩然社稷乂安克
廣其業不亦善乎百官有司其祇奉膺子以答天休宣

布寓內咸使聞悉於是羣公奏曰昔三皇之世澹泊無
爲故稱皇是以漢高祖旣稱皇帝尊其父爲太上皇明
不統天下今皇帝幼冲萬機大政猶宜陛下總之謹上
尊號太上皇帝乃從之己酉太上皇帝徙御崇光宮採
椽不斷土階而已國之大事咸以聞承明元年年二十
三崩於永安殿上尊諡曰獻文皇帝廟號顯祖葬雲中
金陵

史臣曰聰叡夙成兼資能斷其顯祖之謂乎故能更清
漠野大啓南服而早懷厭世之心終致宮闈之變將天
意哉

魏書卷六

魏書卷六考證

顯祖紀廣陵公侯窮奇○前云給事中京兆侯張窮奇
此云廣陵公侯窮奇疑或有誤

魏書卷六考證

魏書卷七上

齊

魏

收

撰

帝紀第七

高祖紀上

高祖孝文皇帝諱宏顯祖獻文皇帝之長子母曰李夫人皇興元年八月戊申生於平城紫宮神光照於室內天地氛氲和氣充塞帝生而潔白有異姿襁褓岐嶷長而淵裕仁孝綽然有君人之表顯祖尤愛異之三年夏六月辛未立爲皇太子五年秋八月丙午卽皇帝位於太華前殿大赦改元延興元年丁未劉彧遣使朝貢九

月壬戌詔在位及民庶直言極諫有利民益治損政傷化悉心以聞壬午青州高陽民封辯自號齊王聚黨千餘人州軍討滅之高麗民奴久等相率來降各賜田宅冬十月丁亥沃野統萬二鎮勅勒叛詔太尉隴西王源賀追擊至枹罕滅之斬首三萬餘級徙其遺迸於冀定相三州爲營戶庚寅以征東大將軍南安王楨爲假節都督涼州及西戎諸軍事領護西域校尉儀同三司鎮涼州朔方民曹平原招集不逞破石樓堡殺軍將劉彧將垣崇祖率衆二萬自郁洲寇東兗州屯于南城固十有一月刺史于洛侯討破之崇祖還郁洲妖賊司馬小

君聚衆反於平陵齊州刺史武昌王平原討擒之十有二月乙酉以駙馬都尉穆亮爲趙郡王壬辰詔訪舜後獲東萊郡民媯苟之復其家畢世以彰盛德之不朽復前濮陽王孔雀本封辛丑趙郡王穆亮徙封長樂王

二年春正月乙卯統萬鎮胡民相率北叛詔寧南將軍交趾公韓拔等追滅之大陽蠻酋桓誕率戶內屬拜征南將軍封襄陽王曲赦京師及河西南至秦涇西至枹罕北至涼州諸鎮詔假員外散騎常侍邢祐使於劉彧二月乙巳詔曰尼父稟達聖之姿體生知之量窮理盡性道光四海頃者淮徐未賓廟隔非所致令祠典寢頓

禮章殄滅遂使女巫妖覲淫進非禮殺生鼓舞倡優媠狎豈所以尊明神敬聖道者也自今已後有祭孔子廟制用酒脯而已不聽婦女合雜以祈非望之福犯者以違制論其公家有事自如常禮犧牲粢盛務盡豐潔臨事致敬令肅如也牧司之官明糾不法使禁令必行蠕蠕犯塞太上皇帝次於北郊詔諸將討之虜遁走其別帥阿大千率千餘落來降東部勅勒叛奔蠕蠕太上皇帝追之至石磧不及而還壬子高麗國遣使朝貢三月太上皇帝至自北討戊辰以散騎常侍駙馬都尉萬安國爲大司馬大將軍封安城王庚午車駕耕於籍田石

城郡獲曹平原送京師斬之連川敕勒謀叛徙配青徐
齊竟四州爲營戶夏四月庚子詔工商雜伎盡聽赴農
諸州郡課民益種菜果辛亥劉彧遣使朝貢癸酉詔沙
門不得去寺浮遊民間行者仰以公文是月劉彧死子
昱僭立五月丁巳詔軍警給璽印傳符次給馬印六月
安州民遇水雹丐租賑恤丙申詔曰頃者州郡選貢多
不以實碩人所以窮處幽仄鄙夫所以超分妄進豈所
謂旌賢樹德者也今年貢舉尤爲猥濫自今所遣皆門
盡州郡之高才極鄉閭之選閏月壬子蠕蠕寇敦煌鎮
將尉多侯擊走之又寇晉昌守將薛奴擊走之戊午行

幸陰山秋七月光州民孫晏等聚黨千餘人叛通劉昱
刺史叔孫瓚討平之辛丑高麗國遣使朝貢壬寅詔州
郡縣各遣二人才堪專對者赴九月講武當親問風俗
八月丙辰百濟國遣使奉表請師伐高麗辛酉地豆于
庫莫奚國遣使朝貢昌亭國遣使獻蜀馬河西費也頭
反薄骨律鎮將擊走之九月辛巳車駕還宮戊申統萬
鎮將河間王閻虎皮坐貪殘賜死己酉詔以州鎮十一
水丐民田租開倉賑恤又詔流迸之民皆令還本違者
配徙邊鎮冬十月蠕蠕犯塞及於五原十有一月太上
皇帝親討之將度漠襲擊蠕蠕聞軍至大懼北走數千

里以窮寇遠遁不可追乃止丁亥封皇叔略爲廣川王
壬辰分遣使者巡省風俗問民疾苦帝每月一朝崇光
宮十有二月庚戌詔曰書云三載一考三考黜陟幽明
頃者已來官以勞升未久而代牧守無恤民之心競爲
聚斂送故迎新相屬於路非所以固民志隆治道也自
今牧守溫仁清儉克已奉公者可久於其任歲積有成
遷位一級其有貪殘非道侵削黎庶者雖在官甫爾必
加黜罰著之於令永爲彝準詔以代郡事同豐沛代民
先配邊戍者皆免之

三年春正月庚辰詔員外散騎常侍崔演使於劉昱丁

亥改崇光宮爲寧光宮戊戌太上皇帝還至雲中是月
相州執送妖人榮永安於京師斬之詔赦其支黨二月
戊申高麗契丹國並遣使朝貢癸丑詔牧守令長勤率
百姓無令失時同部之內貧富相通家有兼牛通借無
者若不從詔一門之內終身不仕守宰不督察免所居
官戊午太上皇帝至自北討飲至策勳告於宗廟死王
事者復其家詔畿內民從役死事者郡縣爲迎喪給以
葬費甲戌詔縣令能靜一縣劫盜者兼治二縣卽食其
祿能靜二縣者兼治三縣三年遷爲郡守二千石能靜
二郡上至三郡亦如之三年遷爲刺史三月壬午詔諸

倉國穀麥充積者出賜貧民夏四月戊申詔假司空上
黨王長孫觀等討吐谷渾拾寅壬子契丹國遣使朝貢
詔以孔子二十八世孫魯郡孔乘爲崇聖大夫給十戶
以供洒埽六月甲子詔曰往年縣召民秀二人問以守
宰治狀善惡具聞將加賞罰而賞者未幾罪者衆多肆
法傷生情所未忍今特垂寬恕之恩申以解網之惠諸
爲民所列者特原其罪盡可代之秋七月詔河南六州
之民戶收絹一匹綿一斤租三十石乙亥行幸陰山蠕
蠕寇敦煌鎮將樂洛生擊破之事具蠕蠕傳劉昱遣將
寇緣淮諸鎮徐州刺史淮陽公尉元擊走之八月己酉

高麗庫莫奚國並遣使朝獻庚申帝從太上皇帝幸河西拾寅謝罪請降許之九月辛巳車駕並還宮乙亥劉昱遣使朝貢己亥詔曰自今京師及天下之囚罪未分判在獄致死無近親者公給衣衾棺槨葬埋之不得曝露辛丑詔遣使者十人循行州郡檢括戶口其有仍隱不出者州郡縣戶主並論如律庫莫奚國遣使朝獻冬十月太上皇帝親將南討詔州郡之民十丁取一以充行戶收租五十石以備軍糧悉萬斤國遣使朝獻武都王反攻仇池詔長孫觀仍回師討之十有一月戊寅詔以河南七州牧守多不奉法致新邦之民莫能上達遣

使者觀風察獄黜陟幽明其有鰥寡孤獨貧不自存者復其雜徭年八十已上一子不從役力田孝悌才器有益於時信義著於鄉閭者具以名聞癸巳太上皇帝南巡至於懷州所過問民疾苦賜高年孝悌力田布帛十有二月庚戌詔關外苑囿聽民樵採壬子蠕蠕犯邊柔玄鎮二部勅勒叛應之癸丑沙門慧隱謀反伏誅是歲州鎮十一水旱丐民田租開倉賑恤相州民餓死者二千八百四十五人吐谷渾部內羌民鍾豈渴干等二千三百戶內附是年妖人劉舉自稱天子齊州刺史武昌王平原捕斬之

四年春正月丁丑侍中太尉隴西王源賀以病辭位辛
巳粟特國遣使朝獻二月甲辰太上皇帝至自南巡辛
亥吐谷渾拾寅遣子費斗斤入侍并獻方物辛未禁斷
寒食三月丁亥詔員外散騎常侍許赤虎使於劉昱高
麗吐谷渾曹利諸國各遣使朝貢夏五月甲戌蠕蠕國
遣使朝貢六月乙卯詔曰朕應歷數開一之期屬千載
光熙之運雖仰嚴誨猶懼德化不寬至有門房之誅然
下民兇戾不顧親戚一人爲惡殃及合門朕爲民父母
深所愍悼自今以後非謀反大逆干紀外奔罪止其身
而已今德被殊方文軌將一宥刑寬禁不亦善乎闕悉

國遣使朝貢秋七月庚午高麗國遣使朝獻己卯曲赦
仇池癸巳蠕蠕寇敦煌鎮將尉多侯大破之八月庚子
吐谷渾國遣使朝獻戊申大閱於北郊九月以劉昱內
相攻戰詔將軍元蘭等五將三萬騎及假東陽王丕爲
後繼伐蜀漢丙子契丹庫莫奚地豆于諸國各遣使朝
獻冬十月庚子劉昱遣使朝貢十有一月分遣侍臣循
河南七州觀察風俗撫慰初附戊寅吐谷渾國遣使朝
獻是歲州鎮十三大饑丐民田租開倉賑之十有二月
詔西征吐谷渾兵在句律城初叛軍者斬次分配柔玄
武川二鎮斬者千餘人

五年春二月庚子高麗國遣使朝獻癸丑詔定考課明黜陟閏月戊午吐谷渾國遣使朝獻夏四月丁丑龜茲國遣使朝獻癸未詔天下賦調縣專督集牧守對檢送京師違者免所居官詔禁畜鷹鷄開相告之制五月丁酉契丹庫莫奚國各遣使獻名馬丙午詔員外散騎常侍許赤虎使於劉昱丁未幸武州山辛酉幸車輪山六月庚午禁殺牛馬壬申曲赦京師死罪遣備蠕蠕秋八月丁卯高麗吐谷渾地豆于諸國遣使朝獻九月癸卯洛州人賈伯奴豫州人田智度聚黨千餘人伯奴稱恒農王智度稱上洛王夜攻洛州州郡擊之斬伯奴於緱

氏執智度送京師冬十月蠕蠕國遣使朝獻太上皇帝
大閱於北郊十有二月丙寅建昌王長樂改封安樂王
己丑城陽王長壽薨庚寅劉昱遣使朝貢

承明元年春二月蠕蠕高麗庫莫奚波斯諸國並遣使
朝貢是月司空東郡王陸定國坐事免官爵爲兵夏五
月冀州武邑民宋伏龍聚衆自稱南平王郡縣捕斬之
蠕蠕國遣使朝貢六月甲子詔中外戒嚴分京師見兵
爲三等第一軍出遣第一兵二等兵亦如之辛未太上
皇帝崩壬申大赦改年大司馬大將軍安城王萬安國
坐矯詔殺神部長奚買奴於苑中賜死戊寅征西大將

軍安樂王長樂爲太尉尚書左僕射南平公日辰爲司徒進封宜都王南部尚書李訢爲司空尊皇太后爲太皇太后臨朝稱制秋七月甲辰追尊皇妣李貴人爲思皇后以汝陰王天賜爲征西大將軍儀同三司高麗庫莫奚國並遣使朝貢濮陽王孔雀有罪賜死八月甲子詔曰朕猥承前緒纂戎洪烈思隆先志緝熙政道羣公卿士其各勉厥心匡朕不逮諸有便民利國者具狀以聞壬午蠕蠕國遣使朝貢甲申以長安二蠶多死丐民歲賦之半九月丁亥曲赦京師高麗庫莫奚契丹諸國並遣使朝獻癸丑宕昌悉萬斤國並遣使朝貢冬十月

丁巳起七寶永安行殿乙丑進征西大將軍假東陽王
元丕爵爲正王己未詔曰朕纂承皇極照臨萬方思闡
遐風光被兆庶使朝有不諱之音野無自蔽之響疇咨
帝載詢及芻蕘自今已後羣官卿士下及吏民各聽上
書直言極諫勿有所隱諸有便宜益治利民可以正風
俗者有司以聞朕將親覽與三事大夫論其可否裁而
用之辛未與駕幸建明佛寺大宥罪人濟南公羅拔進
爵爲王十有一月蠕蠕國遣使朝貢戊子以太尉安樂
王長樂爲定州刺史京兆王子推爲青州刺史司空李
訢爲徐州刺史並開府儀同三司

太和元年春正月乙酉朔詔曰朕夙承寶業懼不堪荷而天貺具臻地瑞並應風和氣暄天人交協豈朕沖昧所能致哉實賴神祇七廟降福之助今三正告初祇感交切宜因陽始協典革元其改今號爲太和元年辛亥詔曰今牧民者與朕共治天下也宜簡以徭役先之勸獎相其水陸務盡地利使農夫外布桑婦內勤若輕有徵發致奪民時以侵擅論民有不從長教惰於農桑者加以罪刑起太和安昌二殿己酉秦州略陽民王元壽聚衆五千餘家自號爲衝天王雲中饑開倉賑恤二月丙寅漢川民泉會譚酉等相率內屬處之并州辛未秦

益二州刺史武都公尉洛侯討破元壽獲其妻子送京師癸未高麗契丹庫莫奚國各遣使朝獻三月庚子徵征西大將軍雍州刺史東陽王丕爲司徒丙午詔曰朕政治多闕災眚屢興去年牛疫死傷大半耕墾之利當有虧損今東作旣興人須肄業其勅在所督課田農有牛者加勤於常歲無牛者倍庸於餘年一夫制治田四十畝中男二十畝無令人有餘力地有遺利庫莫奚契丹國各遣使朝獻夏四月丙寅蠕蠕國遣使朝貢丁卯幸白登山壬申幸崞山樂安王良薨詔復前東郡王陸定國官爵五月乙酉車駕祈雨於武州山俄而澍雨大

洽蠕蠕國遣使朝貢秋七月壬辰侍中開府儀同三司
青州刺史京兆王子推薨庚子定三等死刑己酉太和
安昌二殿成起朱明思賢門是月劉昱死弟準僭立八
月壬子大赦天下丙子詔曰工商皂隸各有厥分而有
司縱濫或染清流自今戶內有工役者唯止本部丞已
下準次而授若階藉元勳以勞定國者不從此制戊寅
劉準遣使朝貢九月癸未蠕蠕國遣使朝貢乙酉詔羣
臣定律令於太華殿辛卯高麗國遣使朝貢庚子起永
樂遊觀殿於北苑穿神淵池車多羅西天竺舍衛疊伏
羅諸國各遣使朝貢冬十月癸酉宴京邑耆老年七十

已上於太華殿賜以衣服是月庫莫奚契丹國各遣使朝獻又詔七十已上一子不從役龜茲國遣使朝獻劉準葭蘆戍主楊文度遣弟鼠襲陷仇池丙子誅徐州刺史李訢庫莫奚契丹國各遣使朝貢十有二月癸未詔征西將軍廣川公皮懽喜鎮西將軍梁醜奴平西將軍楊靈珍等率衆四萬討楊鼠乙酉吐谷渾國遣使朝獻丁亥懷州民伊祈苟初自稱堯後應王聚衆於重山洛州刺史馮熙討滅之閏月懽喜等軍到建安楊鼠棄城南走癸亥粟提婆國遣使朝獻庚子詔員外散騎常侍李長仁使於劉準十有二月壬寅懽喜攻陷葭蘆斬文

度傳首京師甲辰員闕吐谷渾國並遣使朝貢丁未詔以州郡八水旱蝗民飢開倉賑恤以安定王休爲儀同三司

二年春正月丁巳封昌黎王馮熙第二子始興爲北平王戊午吐谷渾遣使朝獻二月丁亥行幸代之湯泉所過問民疾苦以宮人賜貧民無妻者戊戌蠕蠕國遣使朝獻癸卯車駕還宮三月丙子以河南公梁彌機爲宕昌王夏四月甲申幸崞山丁亥還宮己丑劉準遣使朝貢京師蝗甲辰祈天災於北苑親自禮焉減膳避正殿丙午澍雨大洽曲赦京師五月詔曰婚娉過禮則嫁娶

有失時之弊厚葬送終則生者有糜費之苦聖王知其如此故申之以禮數約之以法禁廼者民漸奢尚婚葬越軌致貧富相高貴賤無別又皇族貴戚及士民之家不惟氏族高下與非類婚偶先帝親發明詔爲之科禁而百姓習常仍不肅改朕今憲章舊典祇案先制著之律令永爲定準犯者以違制論六月己丑幸鹿野苑庚子皇叔若薨秋七月戊辰龜茲國遣使獻名驪七十頭劉準遣將寇仇池陰平太守楊廣香擊走之八月分遣使者考察守宰問民疾苦丙戌詔罷諸州禽獸之貢丁亥勿吉國遣使朝獻九月丙辰曲赦京師龜茲國遣使

獻大馬名馳珍寶甚衆冬十月壬辰詔員外散騎常侍
鄭義使於劉準十有一月庚戌詔曰懸爵於朝而有功
者必縻其賞懸刑於市而有罪者必罹其辜斯乃古今
之成典治道之實要諸州刺史牧民之官自頃以來遂
各怠慢縱姦納賂背公緣私致令賊盜並興侵劫滋甚
姦宄之聲屢聞朕聽朕承大平之運屬千載之期思光
洪緒惟新庶績亦望蕃翰羣司敷德宣惠以助沖人共
成斯美幸克已復禮思愆改過使寡昧無愧於祖宗百
姓見德於當世有司明爲條禁稱朕意焉十有一月癸
巳誅南郡王李惠是歲州鎮二十餘水旱民飢開倉賑

恤三年春正月癸丑坤德六合殿成庚申詔罷行察官
二月辛巳帝太皇太后幸代郡溫泉問民疾苦鰥貧者
以宮女妻之己亥還宮壬寅乾象六合殿成三月甲辰
曲赦京師戊午吐谷渾高麗國各遣使朝獻夏四月壬
申劉準遣使朝獻癸未樂浪王樂平薨辛卯蠕蠕國遣
使朝獻丙申幸崞山己亥還宮庚子淮陽公尉元進爵
爲王吐谷渾國遣使獻犛牛五十頭雍州刺史宜都王
目辰有罪賜死五月丁巳帝祈雨於北苑閉陽門是日
澍雨大洽辛酉詔曰昔四代養老問道乞言朕雖沖昧
每尚其美今賜國老各衣一襲綿五斤絹布各五疋六

月辛未以雍州民飢開倉賑恤起文石室靈泉殿於方

山秋七月壬寅詔宮人年老及疾病者免之八月壬申

詔羣臣直言盡規靡有所隱乙亥幸方山起思遠佛寺

丁丑還宮九月壬子以侍中司徒東陽王丕爲太尉侍

中尚書右僕射趙郡公陳建爲司徒進爵魏郡王侍中

尚書河南公苟頹爲司空進爵河東王侍中尚書太原

公王叡進爵中山王侍中尚書隴東公張祐進爵新平

王己未定州刺史安樂王長樂有罪徵詣京師賜死庚

申隴西王源賀薨高麗吐谷渾地豆于契丹庫莫奚龜

茲諸國各遣使朝獻冬十月己巳朔大赦天下十有一

月癸卯賜京師貧窮高年疾患不能自存者衣服布帛
各有差癸丑進假梁郡公元嘉爵爲假王督二將出淮
陰隴西公元琛三將出廣陵河東公薛虎子三將出壽
春蠕蠕率騎十餘萬南寇至塞而還十有二月粟特州
逸河龔疊伏羅員闕悉萬斤諸國各遣使朝貢是年島
夷蕭道成廢其主劉準而僭立自號曰齊

四年春正月癸卯乾象六合殿成洮陽羌叛枹罕鎮將
討平之隴西公元琛等攻剋蕭道成馬頭戍乙卯廣川
王略薨雍州氏齊男王反殺美陽令州郡捕斬之丁巳
罷畜鷹鶴之所以其地爲報德佛寺戊午襄城王韓頽

有罪削爵徙邊蕭道成徐州刺史崔文仲寇淮北陷荏
眉戍二月遣尚書游明根率騎二千南討癸巳詔曰朕
承乾緒君臨海內夙興昧旦如履薄冰今東作方興庶
類萌動品物資生膏雨不降歲一不登百姓飢乏朕甚
懼焉其敕天下祀山川羣神及能興雲雨者修飾祠堂
薦以牲璧民有疾苦所在存問三月丙午詔車騎大將
軍馮熙督衆迎還假梁郡王嘉等諸軍乙卯蠕蠕國遣
使朝貢四月乙卯幸廷尉籍坊二獄引見諸囚詔曰廷
尉者天下之平民命之所懸也朕得惟刑之恤者仗獄
官之稱其任也一夫不耕將或受其餒一婦不織將或

受其寒今農時要月百姓肆力之秋而愚民陷罪者甚
衆宜隨輕重決遣以赴耕耘之業辛巳幸白登山甲申
賜天下貧人一戶之內無雜財穀帛者廩一年五月丙
申朔幸火山壬寅還宮六月丁卯以澍雨大洽曲赦京
師以紬綾絹布百萬匹及南伐所俘賜王公已下秋七
月辛亥行幸火山壬子改作東明觀詔會京師耆老賜
錦綵衣服几杖稻米蜜麵復家人不徭役悉萬斤國遣
使朝貢閏月丁亥幸虎圈親錄囚徒輕者皆免之壬辰
頓丘王李鍾葵有罪賜死蕭道成角城戍主請舉城內
屬八月丁酉詔徐州刺史假梁郡王嘉赴接之又遣平

南將軍郎大檀三將出胸城將軍白吐頭二將出海西
將軍元泰二將出連口將軍封匹三將出角城鎮南將
軍賀羅出下蔡甲辰幸方山戊申幸武州山石窟寺庚
戌還宮乙卯詔諸州置冰室蕭道成梁州刺史崔慧景
遣長史裴叔保率衆寇武興關城氏帥楊鼠擊破之叔
保還南鄭九月蕭道成汝南太守常元真龍驤將軍胡
青苟率戶內屬乙亥思義殿成壬午東明觀成戊子詔
曰隆寒雪降諸在徽纆及轉輸在都或有凍餒朕用愍
焉可遣侍臣詣廷尉獄及有囚之所周巡省察飢寒者
給以衣食桎梏者代以輕鎖假梁郡王嘉破蕭道成將

盧紹之立元度於朐山其下蔡戍主棄城遁走冬十月
丁未詔昌黎王馮熙爲西道都督與征南將軍桓誕出
義陽鎮南將軍賀羅自下蔡東出鍾離蘭陵民桓富殺
其縣令與昌慮桓和北連太山羣盜張和顏等聚黨保
五固推司馬朗之爲主詔淮陽王尉元等討之是歲詔
以州鎮十八水旱民飢開倉賑恤

五年春正月己卯車駕南巡丁亥至中山親見高年問
民疾苦二月辛卯朔大赦天下賜孝悌力田孤貧不能
自存者穀帛有差免宮人年老者還其所親丁酉車駕
幸信都存問如中山癸卯還中山己酉講武于唐水之

陽庚戌車駕還都沙門法秀謀反伏誅南征諸將擊破
蕭道成游擊將軍桓康於淮陽道成豫州刺史垣崇祖
寇下蔡昌黎王馮熙擊破之假梁郡王嘉大破道成將
俘獲三萬餘口送京師三月辛酉朔車駕幸肆州癸亥
講武于雲水之陽所經考察守宰加以黜陟己巳車駕
還宮詔曰法秀妖詐亂常妄說符瑞蘭臺御史張求等
一百餘人招結奴隸謀爲大逆有司科以族誅誠合刑
憲且矜愚重命猶所弗忍其五族者降止同祖三族止
一門門誅止身夏四月己亥行幸方山建永固石室於
山上立碑於石室之庭又銘太皇太后終制于金冊又

起鑿玄殿壬子以南俘萬餘口班賜羣臣甲寅詔曰時
雨不霑春苗萎悴諸有骸骨之處皆敕埋藏勿令露見
有神祇之所悉可禱祈任城王雲薨五月庚申朔詔曰
迺者邊兵屢動勞役未息百姓因之輕陷刑網獄訟煩
興四民失業朕每念之用傷懷抱農時要月民須肆力
其敕天下勿使有留獄久囚壬戌鄧至國遣使朝貢庚
午青州主簿崔次恩聚衆謀叛州軍擊之次恩走郁洲
六月甲辰中山王叡薨戊午封皇叔簡爲齊郡王猛爲
安豐王秋七月甲子蕭道成遣使朝貢辛酉蠕蠕別帥
他稽率衆內附甲戌班乞養雜戶及戶籍之制五條九

月庚午闕武於南郊大饗羣臣蕭道成使車僧朗以班
在劉準使殷靈誕之後辭不就席劉準降人解奉君刃
僧朗於會中詔誅奉君等乙亥封昌黎王馮熙世子誕
爲南平王兗州斬司馬朗之傳首京師冬十月癸卯蠕
蠕國遣使朝貢十有二月癸巳詔以州鎮十二民飢開
倉賑恤

六年春正月甲戌大赦天下二月辛卯詔曰靈丘郡土
旣褊瘠又諸州路衝官私所經供費非一往年巡行見
其勞瘁可復民租調十五年癸巳白蘭王吐谷渾翼世
以誣罔伏誅乙未詔曰蕭道成逆亂江淮戎旗頻舉七

州之民既有征運之勞深乖輕徭之義朕甚愍之其復常調三年戊申地豆于國遣使朝貢癸丑賜王公已下清勤著稱者穀帛有差三月庚辰行幸虎圈詔曰虎狼猛暴食肉殘生取捕之日每多傷害既無所益損費良多從今勿復捕貢辛巳幸武州山石窟寺賜貧老者衣服壬午幸方山是月蕭道成死子躡僭立夏四月甲辰賜畿內鰥寡孤獨不能自存者粟帛有差六月蠕蠕國遣使朝貢秋七月發州郡五萬人治靈丘道八月癸未朔分遣大使巡行天下遭水之處丐民租賦貧儉不自存者賜以粟帛庚子罷山澤之禁九月辛酉以氐楊後

起爲武都王冬十有一月乙卯吐谷渾國遣使朝貢十
有二月丁亥詔曰朕以寡薄政缺平和不能仰緝緯象
蠲茲六沴去秋淫雨洪水爲災百姓嗷然朕用嗟愍故
遣使者循方賑恤而牧守不思利民之道期於取辦愛
毛反裘甚無謂也今課督未入及將來租筭一以丐之
有司勉加勸課以要來穰稱朕意焉

七年春正月庚申詔曰朕每思知百姓之所疾苦以增
修寬政而明不燭遠寔有缺焉故具問守宰苛虐之狀
於州郡使者秀孝計掾而對多不實甚乖朕虛求之意
宜案以大辟明罔上必誅然情猶未忍可恕罪聽歸申

下天下使知後犯無恕丁卯詔青齊光東徐四州之民
戶運倉粟二十萬石送瑕丘琅邪復租筭一年三月甲
戌以冀定二州民飢詔郡縣爲粥於路以食之又弛關
津之禁任其去來夏四月庚子幸崞山賜所過鰥寡不
能自存者衣服粟帛壬寅車駕還宮閏月癸丑皇子生
大赦天下五月戊寅朔幸武州山石窟佛寺六月定州
上言爲粥給飢人所活九十四萬七千餘口秋七月丁
丑帝太皇太后幸神淵池甲申幸方山詔假員外散騎
常侍李彪員外郎蘭英使於蕭贖濟南王羅拔改封趙
郡王九月壬寅詔曰朕承祖宗夙夜惟懼然聽政之際

猶慮未周至於案文審獄思聞已過自今羣官奏事當
獻可替否無或面從俾朕之過彰於遠近冀州上言爲
粥給飢民所活七十五萬一千七百餘口冬十月戊午
皇信堂成十有一月辛丑蕭墮遣使朝貢十有二月癸
丑詔曰淳風行於上古禮化用乎近葉是以夏殷不嫌
一族之婚周世始絕同姓之娶斯皆教隨時設治因事
改者也皇運初基中原未混撥亂經綸日不暇給古風
遺樸未遑釐改後遂因循迄茲莫變朕屬百年之期當
後仁之政思易質舊式昭惟新自今悉禁絕之有犯以
不道論庚午開林慮山禁與民共之詔以州鎮十三民

飢開倉賑恤

八年春正月詔隴西公元琛尙書陸叡爲東西二道大使褒善罰惡二月蠕蠕國遣使朝獻夏四月甲寅幸方山戊午車駕還宮庚申行幸旋鴻池遂幸崢山丁卯還宮五月己卯詔賑賜河南七州戍兵甲申詔員外散騎常侍李彪員外郎蘭英使於蕭墮六月丁卯詔曰置官班祿行之尙矣周禮有食祿之典二漢著受俸之秩逮于魏晉莫不聿稽往憲以經綸治道自中原喪亂茲制中絕先朝因循未遑釐改朕永鑒四方求民之瘼夙興昧旦至於憂勤故憲章舊典始班俸祿罷諸商人以簡

民事戶增調三匹穀二斛九斗以爲官司之祿均預調爲二匹之賦卽兼商用雖有一時之煩終克永逸之益祿行之後賦滿一匹者死變法改度宜爲更始其大赦天下與之惟新戊辰武州水泛濫壞民居舍秋七月乙未行幸方山石窟寺八月甲辰詔曰帝業至重非廣詢無以致治王務至繁非博採無以興功先王知其如此故虛己以求過明恕以思咎是以諫鼓置於堯世謗木立於舜庭用能耳目四達庶類咸熙朕承累聖之洪基屬千載之昌運每布遐風景行前式承明之初班下內外聽人各盡規以補其闕中旨雖宣允稱者少故變時

法遠遵古典班制俸祿改更刑書寬猛未允人或異議
思言者莫由申情求諫者無因自達故令上明不周下
情壅塞今制百辟卿士工商吏民各上便宜利民益治
損化傷政直言極諫勿有所隱務令辭無煩華理從簡
實朕將親覽以知世事之要使言之者無罪聞之者足
以爲戒九月甲午蕭墮遣使朝貢戊戌詔曰俸制已立
宜時班行其以十月爲首每季一請於是內外百官受
祿有差冬十月高麗國遣使朝貢蕭墮雙城戍主王繼
宗內屬十有一月乙未詔員外散騎常侍李彪員外郎
蘭英使於蕭墮十有二月詔以州鎮十五水旱民飢遣

使者循行問所疾苦開倉賑恤

九年春正月戊寅詔曰圖讖之興起於三季旣非經國之典徒爲妖邪所憑自今圖讖祕緯及名爲孔子閉房記者一皆焚之留者以大辟論又諸巫覡假稱神鬼妄說吉凶及委巷諸卜非墳典所載者嚴加禁斷癸未大饗羣臣于太華殿班賜皇誥二月己亥制皇子封王者皇孫及曾孫紹封者皇女封者歲祿各有差以廣陽王建第二子嘉紹建後爲廣陽王乙巳詔曰昔之哲王莫不博採下情勤求箴諫建設旌鼓詢納芻蕘朕班祿刪刑慮不周允虛懷謹直思顯洪猷百司卿士及工商吏

民其各上書極諫靡有所隱三月丙申宕昌國遣使朝
貢封皇弟禧爲咸陽王幹爲河南王羽爲廣陵王雍爲
潁川王勰爲始平王詳爲北海王夏四月癸丑幸方山
甲寅還宮五月高麗國及蕭贖並遣使朝貢六月辛亥
幸方山遂幸靈泉池丁巳還宮秋七月丙寅朔新作諸
門癸未遣使拜宕昌王梁彌機兄子彌承爲其國王戊
子幸魚池登青原岡甲午還宮八月己亥行幸彌澤甲
寅登牛頭山庚申詔曰數州災水饑饉荐臻致有賣鬻
男女者天之所譴在予一人而百姓無辜橫罹艱毒朕
用殷憂夕惕忘食與寢今自太和六年已來買定冀幽

相四州飢民良口者盡還所親雖娉爲妻妾遇之非理
情不樂者亦離之甲子還宮冬十月丁未詔曰朕承乾
在位十有五年每覽先王之典經綸百氏儲畜旣積黎
元永安爰暨季葉斯道陵替富強者并兼山澤貧弱者
望絕一廛致令地有遺利民無餘財或爭畝畔以亡身
或因饑饉以棄業而欲天下太平百姓豐足安可得哉
今遣使者循行州郡與牧守均給天下之田還受以生
死爲斷勸課農桑興富民之本戊申高麗吐谷渾國並
遣使朝貢辛酉侍中司徒魏郡王陳建薨詔員外散騎
常侍李彪尙書郎公孫阿六頭使蕭躋十有二月乙卯

侍中淮南王他爲司徒蠕蠕犯塞詔任城王澄率衆討之是年京師及州鎮十三水旱傷稼宕昌高麗吐谷渾等國並遣使朝貢

魏書卷七上

魏書卷七上考證

高祖紀武都王反攻仇池○綱目癸丑冬十月武都王
楊僧嗣卒弟文度立降魏卽延興三年事也本卷後
云劉準葭蘆戍主楊文度遣弟鼠襲陷仇池不稱武
都王此云武都王反攻仇池又不稱姓名莫可詳也
唯止本部丞已下準次而授○唯止二字監本作推上
今依北史改

乾象六合殿成○

臣人龍

按本卷前云太和三年二月

壬寅乾象六合殿成此處又云四年正月癸卯乾象
六合殿成何句爲正何句爲重不可考矣

--	--	--	--	--	--	--	--	--

魏書卷七下

齊

魏

收

撰

帝紀第七

高祖紀下

十年春正月癸亥朔帝始服袞冕朝饗萬國壬午蠕蠕
犯塞二月甲戌初立黨里隣三長定民戶籍三月丙申
蠕蠕國遣使朝貢庚申蕭蹟遣使朝貢夏四月辛酉朔
始制五等公服甲子帝初以法服御輦祀於西郊癸酉
幸靈泉池戊寅車駕還宮是月高麗吐谷渾國並遣使
朝貢六月辛酉幸方山己卯名皇子曰恂大赦天下秋

七月戊戌幸方山八月乙亥給尚書五等品爵己上朱
衣玉珮大小組綬九月辛卯詔起明堂辟雍冬十月癸
酉有司議依故事配始祖於南郊十有一月議定州郡
縣官依戶給俸十有二月壬申蠕蠕犯塞癸未勿吉國
遣使朝貢乙酉詔以汝南潁川大饑丐民田租開倉賑
恤

十有一年春正月丁亥朔詔定樂章非雅者除之二月
甲子詔以肆州之鴈門及代郡民饑開倉賑恤夏四月
己未吐谷渾國遣使朝貢五月壬辰幸靈泉池遂幸方
山癸巳南平王渾薨甲午車駕還宮詔復七廟子孫及

外戚總服已上賦役無所與詔南部尚書公孫文慶上

谷張伏干率衆南討舞陰山

關

高麗吐谷渾國遣使朝

貢六月辛巳秦州民飢開倉賑恤癸未詔曰春旱至今
野無青草上天致譴寔由匪德百姓無辜將罹饑饉寤
寐思求罔知所益公卿內外股肱之臣謀猷所寄其極
言無隱以救民瘼秋七月己丑詔曰今年穀不登聽民
出關就食遣使者造籍分遣去留所在開倉賑恤八月
壬申蠕蠕犯塞遣平原王陸叡討之事具蠕蠕傳庚辰
大議北伐進策者百有餘人辛巳罷山北苑以其地賜
貧民悉萬斤國遣使朝獻九月庚戌詔曰去夏以歲旱

民飢須遣就食舊籍雜亂難可分簡故依局割民閱戶造籍欲令去留得實賑貸平均然廼者以來猶有餓死衢路無人收識良由本部不明籍貫未實廩恤不周以至於此朕猥居民上聞用慨然可重遣精檢勿令遺漏冬十月辛未詔罷起部無益之作出宮人不執機杼者甲戌詔曰鄉飲禮廢則長幼之叙亂孟冬十月民間歲隙宜於此時導以德義可下諸州黨里之內推賢而長者教其里人父慈子孝兄友弟順夫和妻柔不率長教者具以名聞十有一月丁未詔罷尚方錦繡綾羅之工四民欲造任之無禁其御府衣服金銀珠玉綾羅錦繡

太官雜器太僕乘具內庫弓矢出其大半班賚百官及京師士庶下至工商皂隸逮於六鎮戍士各有差戾申詔曰朕惟上政不明令民陷身罪戾今寒氣勁切杖捶難任自今月至來年孟夏不聽拷問罪人又歲既不登民多飢窘輕繫之囚宜速決了無令薄罪久留獄犴十有二月詔祕書丞李彪著作郎崔光改析國記依紀傳之體是歲大饑詔所在開倉賑恤

十有二年春正月辛巳朔初建五牛旌旗乙未詔曰鎮戍流徙之人年滿七十孤單窮獨雖有妻妾而無子孫諸如此等聽解名還本諸犯死刑者父母祖父母年老

更無成人子孫旁無替親者具狀以聞二月壬戌高麗國遣使朝貢三月丁亥宕昌國遣使朝獻中散梁衆保等謀反伏誅夏四月高麗吐谷渾國並遣使朝貢蕭蹟將陳顯達等寇邊甲寅詔豫州刺史元斤率衆禦之甲子大赦天下乙丑幸靈泉池丁卯遂幸方山己巳還宮陳顯達攻陷醴陽左僕射長樂王穆亮率騎一萬討之五月丁酉詔六鎮雲中河西及關內六郡各修水田通渠溉灌壬寅增置彝器於太廟六月甲寅宕昌國遣使朝貢秋七月己丑幸靈泉池遂幸方山己亥還宮八月甲子勿吉國貢楛矢石弩九月吐谷渾宕昌國遣使朝

貢甲午詔曰日月薄蝕陰陽之恆度耳聖人懼人君之
放怠因之以設誠故稱日蝕修德月蝕修刑迺癸巳夜
月蝕盡公卿已下宜慎刑罰以答天意丁酉起宣文堂
經武殿癸卯侍中司徒淮南王他薨吐谷渾宕昌武興
諸國各遣使朝貢閏月甲子帝觀築園丘於南郊乙丑
高麗國遣使朝貢辛未幸靈泉池癸酉還宮十有一月
詔以二雍豫三州民飢開倉賑恤梁州刺史臨淮王提
坐貪縱徙配北鎮十有二月蠕蠕伊吾戍主高羔子率
衆三千以城內附以侍中安豐王猛爲開府儀同三司
十有三年春正月辛亥車駕有事於園丘於是初備大

駕乙丑兗州民王伯恭聚衆勞山自稱齊王東萊鎮將
孔伯孫討斬之戊辰蕭蹟遣衆寇邊淮陽太守王僧儁
擊走之二月壬午高麗國遣使朝獻庚子引羣臣訪政
道得失損益之宜三月甲子吐谷渾國遣使朝獻夏州
刺史章武王彬以貪賕削封夏四月丁丑詔曰昇樓散
物以賚百姓至使人馬騰踐多有毀傷今可斷之以本
所費之物賜窮老貧獨者丁亥幸靈泉池遂幸方山己
丑還宮吐谷渾國遣使朝貢州鎮十五大饑詔所在開
倉賑恤五月庚戌車駕有事於方澤六月汝陰王天賜
南安王楨並坐贓賄免爲庶人高麗國遣使朝貢秋七

月甲辰陰平國遣使朝貢丙寅辛靈泉池與羣臣御龍
舟賦詩而罷立孔子廟於京師八月乙亥詔兼員外散
騎常侍邢產兼員外散騎侍郎侯靈紹使於蕭蹟戊子
詔諸州鎮有水田之處各通溉灌遣匠者所在指授中
尺國遣使朝貢九月丁未吐谷渾武興宕昌諸國各遣
使朝獻出宮人以賜北鎮人貧鰥無妻者冬十月甲申
高麗國遣使朝貢十有一月己未安豐王猛薨十有二
月丙子侍中司空河東王苟頽薨甲午蕭蹟遣使朝貢
己亥以尚書令尉元爲司徒左僕射穆亮爲司空是歲
蠕蠕別帥叱呂勤率衆內附

十有四年春正月乙丑行幸方山二月辛未行幸靈泉池壬申還宮戊寅初詔定起居注制己卯詔遣侍臣循行州郡問民疾苦三月壬申吐谷渾宕昌武興陰平諸國並遣使朝貢夏四月地豆于頻犯塞甲戌征西大將軍陽平王熙擊走之甲午詔兼員外散騎常侍邢產兼員外散騎侍郎蘇季連使於蕭贖五月己酉庫莫奚犯塞安州都將樓龍兒擊走之沙門司馬惠御自言聖王謀破平原郡擒獲伏誅秋七月甲辰詔罷都牧雜制丙午行幸方山丙辰遂幸靈泉池高麗國遣使朝貢八月丙寅朔車駕還宮辛卯宕昌國遣使朝貢詔議國之行

次九月癸丑太皇太后馮氏崩壬戌高麗國遣使朝貢
詔聽蕃鎮曾經內侍者前後奔赴冬十月戊辰詔曰自
丁荼苦奄踰晦朔仰遵遺旨祖奠有期朕將親侍龍輿
奉訣陵隧諸常從之具悉可停之其武衛之官防侍如
法癸酉葬文明太皇太后於永固陵甲戌車駕謁永固
陵羣臣固請公除帝不許己卯車駕謁永固陵庚辰帝
居廬引見羣寮於太和殿太尉東陽王丕等據權制固
請帝引古禮往復羣臣乃止詔在禮志京兆王太興有
罪免官削爵詔曰公卿屢依金冊遺旨中代權式請過
葬卽吉朕思遵遠古終三年之制依禮旣虞卒哭此月

二十一日授服以葛易麻既衰服在上公卿不得獨釋於下故於朕之授服變從練禮已下復爲節降斟酌今古以制厥衷且取遺旨速除之一端粗申臣子罔極之巨痛癸未詔曰朕遠遵古式欲終三年之禮百辟羣官據金冊顧命將奪朕心從先朝之制朕仰惟金冊俯自推省取諸二衷不許衆議以衰服過朞終四節之慕又奉聖訓聿修誥旨不敢閤嘿自居以曠機政府庶不愆遺令之意差展哀慕之情普下州鎮長至三元絕告慶之禮甲申車駕謁永固陵辛卯詔曰羣官以萬機事重請求聽政朕仰祇遺命亦思無怠但哀慕纏綿心神迷塞

未堪自力以親政事近侍先掌機衡者皆謀猷所寄且
可任之如有疑事當時與論決十有一月甲寅詔曰垂
及至節感慕崩摧凡在臣列誰不哽切內外職人先朝
班次及諸方雜客冬至之日盡聽入臨三品以上衰服
者至夕復臨其餘唯旦臨而已其拜哭之節一依別儀
丁巳蕭蹟遣使朝貢十有二月壬午詔依準丘井之式
遣使與州郡宣行條制隱口漏丁卽聽附實若朋附豪
勢陵抑孤弱罪有常刑

十五年春正月丁卯帝始聽政於皇信東室初分置左
右史官吐谷渾國遣使朝貢二月乙亥枹罕鎮將長孫

百年請討吐谷渾所置洮陽泥和二戍許之己丑蕭蹟遣使朝貢三月甲辰車駕謁永固陵己酉悉萬斤等五國遣使朝貢夏四月癸亥帝始進蔬食乙丑謁永固陵自正月不雨至于癸酉有司奏祈百神詔曰昔成湯遇旱齊景逢災並不由祈山川而致雨皆至誠發中澍潤千里萬方有罪在予一人今普天喪恃幽顯同哀神若有靈猶應未忍安饗何宜四氣未周便欲祀事唯當考躬責已以待天譴甲戌詔員外散騎常侍李彪尚書郎公孫阿六頭使於蕭蹟己卯經始明堂改太廟五月己亥議改律令於東明觀折疑獄乙卯百年攻洮陽泥和

二戊克之俘獲三千餘人詔悉免歸高麗國遣使朝獻
丙辰詔造五輅六月丁未濟陰王鬱以貪殘賜死秋七
月乙丑謁永固陵規建壽陵戊寅吐谷渾國遣使朝貢
己卯詔議祖宗以道武爲太祖乙酉車駕巡省京邑聽
訟而還八月壬辰議養老又議肆類上帝禋于六宗之
禮帝親臨決詔郡國有時物可以薦宗廟者貢之戊戌
移道壇於桑乾之陰改曰崇虛寺己亥詔諸州舉秀才
先盡才學乙巳親定禘祫之禮丁巳議律令事仍省雜
祀九月辛巳蕭墮遣使朝貢壬午吐谷渾高麗宕昌鄧
至諸國並遣使朝獻冬十月庚寅車駕謁永固陵是月

明堂太廟成十有一月丁卯遷七廟神主於新廟乙亥
大定官品戊寅考諸牧守詔假通直散騎常侍李彪假
散騎侍郎蔣少遊使蕭蹟丙戌初罷小歲賀丁亥詔二
千石考在上上者假四品將軍賜乘黃馬一匹上中者
五品將軍上下者賜衣一襲十有二月壬辰遷社於內
城之西癸巳班賜刺史已下衣冠以安定王休爲太傅
齊郡王簡爲太保帝爲高麗王璉舉哀於城東行宮己
酉車駕迎春於東郊辛亥詔簡選樂官

十有六年春正月戊午朔饗羣臣於太華殿帝始爲王
公興懸而不樂己未宗祀顯祖獻文皇帝於明堂以配

上帝遂升靈臺以觀雲物降居青陽左个布政事每朔
依以爲常辛酉始以太祖配南郊壬戌詔定行次以水
承金甲子詔罷祖祿疑乙丑制諸遠屬非太祖子孫及
異姓爲王皆降爲公公爲侯侯爲伯子男仍舊皆除將
軍之號戊辰帝臨思義殿策問秀孝丙子始以孟月祭
廟二月戊子帝移御永樂宮庚寅壞太華殿經始太極
殿辛卯罷寒食饗壬辰幸北部曹歷觀諸省巡省京邑
聽理冤訟甲午初朝日于東郊遂以爲常丁酉詔祀唐
堯於平陽虞舜於廣寧夏禹於安邑周文於洛陽丁未
改謚宣尼曰文聖尼父告謚孔廟三月丁卯巡省京邑

癸酉省西郊郊天雜事乙亥車駕初迎氣南郊自此爲常辛巳以高麗王璉孫雲爲其國王蕭蹟遣使朝貢是月高麗鄧至國並遣使朝貢四月丁亥朔班新律令大赦天下癸巳契齧國遣使朝貢甲寅幸皇宗學親問博士經義五月癸未詔羣臣於皇信堂更定律條流徒限制帝親臨決之六月己丑高麗國遣使朝貢甲辰詔曰務農重穀王政所先勸率田疇君人常事今四氣休序時澤滂潤宜用天分地悉力東畝然京師之民遊食者衆不加督勸或芸耨失時可遣明使檢察勤惰以聞秋七月庚申吐谷渾世子賀虜頭來朝壬戌詔曰王者設

官分職垂拱責成振綱舉綱衆目斯理朕德謝知人豈能一見鑒識徒乖爲君委授之義自今選舉每以季月本曹與吏部銓簡甲戌詔兼員外散騎常侍宋弁兼員外散騎侍郎房亮使於蕭墮八月庚寅車駕初夕月於西郊遂以爲常辛卯高麗國遣使朝貢乙未詔陽平王頤左僕射陸叡督十二將七萬騎北討蠕蠕丙午宕昌王梁彌承來朝司徒尉元以老遜位己酉以尉元爲三老游明根爲五更又養國老庶老將行大射之禮雨不克成癸丑詔曰文武之道自古並行威福之施必也相藉故三五至仁尚有征伐之事夏殷明叡未捨兵甲之

行然則天下雖平忘戰者始不教民戰可謂棄之是以

周立司馬之官漢置將軍之職皆所以輔文強武威肅
四方者矣國家雖崇文以懷九服修武以寧八荒然於
習武之方猶爲未盡今則訓文有典教武闕然將於馬
射之前先行講武之式可勅有司豫修塲埒其列陣之
儀五戎之數別俟後勅九月甲寅朔大序昭穆於明堂
祀文明太皇太后於立室辛未帝以文明太皇太后再
周忌日哭於陵左絕膳三日哭不輟聲辛巳武興王楊
集始來朝冬十月乙酉鄧至國遣使朝獻己亥以太傅
安定王休爲大司馬特進馮誕爲司徒甲辰詔以功臣

配饗太廟丙午高麗國遣使朝獻庚戌太極殿成大饗
羣臣十有一月乙卯依古六寢權制三室以安昌殿爲
內寢皇信堂爲中寢四下疑爲外寢十有二月賜京邑
老人鳩杖是月蕭躋遣使朝貢

十有七年春正月壬子朔帝饗百寮於太極殿乙丑詔
曰夫駿奔入覲臣下之常式錫馬賜車君人之恒惠今
諸邊君蕃胤皆虔集象魏趨鏘紫庭貢饗旣畢言旋無
遠各可依秩賜車旗衣馬務令優厚其武興宕昌各賜
錦繒纒一千吐谷渾世子八百鄧至世子雖因緣至都
亦宜賚及可賜三百命數之差皆依別牒詔兼員外散

騎侍郎劉承叔使於蕭蹟乙亥勿吉國遣使朝獻丙子以吐谷渾伏連籌爲其國王庚辰蠲大司馬安定王休太保齊郡王簡朔望之朝二月乙酉詔賜議律令之官各有差已酉車駕始籍田於都南三月戊辰改作後宮帝幸永興園徙御宣文堂吐谷渾國遣使朝獻夏四月戊戌立皇后馮氏是月蕭蹟征虜將軍直閭將軍蠻酋田益宗率部落四千餘戶內屬五月乙卯宕昌陰平契丹庫莫奚諸國並遣使朝獻壬戌宴四廟子孫於宣文堂帝親與之齒行家人之禮甲子帝臨朝堂引見公卿已下決疑政錄囚徒丁丑以旱撤膳襄陽蠻酋雷婆思

等率一千三百餘戶內徙居於太和川六月丙戌帝將南伐詔造河橋己丑詔免徐南豫陝岐東徐洛豫七州軍糧乙未講武乙己詔曰六職備于周經九列炳於漢晉務必有恒人守其職比百秩雖陳事典未叙自八元樹位躬加省覽遠依往籍近採時宜作職員令二十一卷事迫戎期未善周悉雖不足綱範萬度永垂不朽且可釋滯目前釐整時務須待軍回更論所闕權可付外施行其有當局所疑而令文不載者隨事以聞當更附之立皇子恂爲皇太子戊申高麗國遣使朝獻秋七月癸丑以皇太子立詔賜民爲人後者爵一級爲公士曾

爲吏屬者爵二級爲上造鰥寡孤獨不能自存者人粟五斛戊午中外戒嚴是月蕭躋死孫昭業僭立八月乙酉三老山陽郡公尉元薨丙戌車駕類於上帝遂臨尉元喪丁亥帝辭永固陵己丑車駕發京師南伐步騎百餘萬大尉丕奏請以宮人從詔曰臨戎不語內事宜停來請壬寅車駕至肆州民年七十已上賜爵一級路見眇跛者停駕親問賜衣食終身戊申幸并州親見高年問所疾苦九月壬子詔兼員外散騎常侍高聰兼員外散騎侍郎賈禎使於蕭昭業丁巳詔以車駕所經傷民秋稼者畝給穀五斛戊辰濟河詔洛懷并肆所過四州

之民百年以上假縣令九十以上賜爵三級八十以上
賜爵二級七十以上賜爵一級鰥寡孤獨不能自存者
粟人五斛帛二匹孝悌廉義文武應求者皆以名聞又
詔廝養之戶不得與士民婚有文武之才積勞應進者
同庶族例聽之庚午幸洛陽周巡故宮基址帝顧謂侍
臣曰晉德不修早傾宗祀荒毀至此用傷朕懷遂詠黍
離之詩爲之流涕壬申觀洛橋幸太學觀石經乙亥鄧
至王像舒彭遣子舊詣闕朝貢并奉表求以位授舊詔
許之丙子詔六軍發軫丁丑戎服執鞭御馬而出羣臣
稽顙於馬前請停南伐帝乃止仍定遷都之計冬十月

戊寅朔幸金墉城詔徵司空穆亮與尚書李沖將作大匠董爵經始洛京己卯幸河南城乙酉幸豫州癸巳次於石濟乙未解嚴設壇於滑臺城東告行廟以遷都之意大赦天下起滑臺宮又詔京師及諸州從戎者賜爵一級應募者加二級主將加三級癸卯幸鄴城乙巳詔安定王休率從官迎家於代京車駕送於漳水上初帝之南伐也起宮殿於鄴西十有一月癸亥宮成徙御焉十有二月戊寅巡省六軍庚寅陰平國遣使朝貢乙未詔隱恤軍士死亡疾病務令優給

十有八年春正月丁未朔朝羣臣於鄴宮澄鸞殿丁巳

高麗國遣使朝獻癸亥車駕南巡詔相兗豫三州百年
以上假縣令九十以上賜爵二級七十以上賜爵一級
孤老鰥寡不能自存者賜粟五石帛二疋孝悌廉義文
武應求者皆以名聞戊辰經殷比干之墓祭以大牢乙
亥幸洛陽西宮二月己丑行幸河陰規建方澤之所丙
申河南王幹徙封趙郡潁川王雍徙封高陽壬寅車駕
北巡癸卯濟河蕭昭業遣使朝貢甲辰詔天下喻以遷
都之意閏月癸亥次句注陘南皇太子朝于蒲池壬申
至平城宮癸酉臨朝堂部分遷留甲戌謁永固陵三月
庚辰罷西郊祭天壬辰帝臨太極殿論在代羣臣以遷

移之略夏五月乙亥詔罷五月五日七月七日饗六月
己巳詔兼員外散騎常侍盧昶兼員外散騎侍郎王清
石使於蕭昭業秋七月乙亥以宋王劉昶爲大將軍壬
午侍中大司馬安定王休薨辛卯高麗國遣使朝貢壬
辰車駕北巡戊戌謁金陵辛丑幸朔州是月島夷蕭鸞
殺其主蕭昭業立昭業弟昭文八月癸卯皇太子朝於
行宮甲辰行幸陰山觀雲川丁未幸閱武臺臨觀講武
癸丑幸懷朔鎮己未幸武川鎮辛酉幸撫冥鎮甲子幸
柔玄鎮乙丑南還所過皆親見高年問民疾苦貧窘孤
老賜以粟帛丙寅詔六鎮及禦夷城人年八十以上而

無子孫兄弟終身給其廩粟七十以上家貧者各賜粟十斛又詔諸北城人年滿七十以上及廢疾之徒校其元犯以準新律事當從坐者聽一身還鄉又令一子扶養終命之後乃遣歸邊自餘之處如此之犯年八十以上皆聽還戊辰車駕次旋鴻池庚午謁永固陵辛未還平城宮九月壬申朔詔曰三載考績自古通經三考黜陟以彰能否今若待三考然後黜陟可黜者不足爲遲可進者大成賒緩是以朕今三載一考考卽黜陟欲令愚滯無妨於賢者才能不壅於下位各令當曹考其優劣爲三等六品以下尚書重問五品以上朕將親與公

卿論其善惡上上者遷之天下者黜之中中者守其本
任壬午帝臨朝堂親加黜陟壬辰陰平王楊昺來朝冬
十月甲辰以太尉東陽王丕爲太傅戊申親告太廟奉
遷神主辛亥車駕發平城宮壬戌次於中山之唐湖乙
丑分遣侍臣巡問民所疾苦己巳幸信都庚午詔曰比
聞緣邊之蠻多有竊掠致有父子乖離室家分絕旣虧
和氣有傷仁厚方一區宇子育萬姓若苟如此南人豈
知朝德哉可詔荆郢東荆三州勒勅蠻民勿有侵暴是
月蕭鸞廢殺其主蕭昭文而僭立十有一月辛未朔詔
冀定二州民百年以上假以縣令九十以上賜爵三級

八十以上賜爵二級七十以上賜爵一級鰥寡孤獨不能自存者賜以穀帛孝義廉貞文武應求者具以名聞丁丑車駕幸鄴甲申經比干之墓傷其忠而獲戾親爲弔文樹碑而刊之己丑車駕至洛陽蕭鸞雍州刺史曹虎據襄陽請降十有二月辛丑朔遣行征南將軍薛真度督四將出襄陽大將軍劉昶出義陽徐州刺史元衍出鍾離平南將軍劉藻出南鄭壬寅革衣服之制癸卯詔中外戒嚴戊申優復代遷之戶租賦三歲己酉詔王公侯伯子男開國食邑者王食半公三分食一侯伯四分食一子男五分食一辛亥車駕南伐丁卯詔郢豫二

州之民百齡以上假縣令九十以上賜爵三級八十以上賜爵二級七十以上賜爵一級孤寡鰥老不能自存者賜以穀帛緣路之民復田租一歲孝悌廉義文武應求具以名聞戊辰車駕至懸瓠己巳詔壽陽鍾離馬頭之師所獲男女之口皆放還南

十有九年春正月辛未朔朝饗羣臣於懸瓠癸酉詔禁淮北之民不得侵掠犯者以大辟論甲戌檄喻蕭鸞丙子鸞龍陽縣開國侯王朗自渦陽來降壬午講武於汝水之西大賚六軍丙申平南將軍王肅頰破蕭鸞將擒其寧州刺史董巒己亥車駕濟淮二月甲辰幸八公山

路中雨甚詔去蓋見軍士病者親隱恤之戊申車駕巡
淮而東民皆安堵租運屬路壬子高麗國遣使朝獻丙
辰車駕至鍾離戊午軍士擒蕭鸞三千卒帝曰在君爲
君其民何罪於是免歸辛酉車駕發鍾離將臨江水司
徒馮誕薨壬戌乃詔班師丁卯遣使臨江數蕭鸞殺主
自立之罪惡三月戊寅幸邵陽戊子太師馮熙薨乙未
幸下邳鄧至國遣使朝貢夏四月庚子車駕幸彭城辛
丑帝爲太師馮熙舉哀於行在所丁未曲赦徐豫二州
其運漕之士復租賦三年辛亥詔賜百歲以上假縣令
九十以上賜爵三級八十以上賜爵二級七十以上賜

爵一級孤寡老疾不能自存者賜以穀帛德著丘園者具以名聞蕭鸞民降者給復十五年癸丑幸小沛遣使以太牢祭漢高祖廟己未行幸瑕丘遣使以太牢祠岱岳詔宿衛武官增位一級庚申行幸魯城親祠孔子廟辛酉詔拜孔氏四人顏氏二人爲官詔兗州刺史舉部內士人才堪軍國及守宰治行具以名聞又詔賜兗州民爵及粟帛如徐州又詔選諸孔宗子一人封崇聖侯邑一百戶以奉孔子之祀又詔兗州爲孔子起園栢修飾墳壠更建碑銘褒揚聖德戊辰行幸碭礮太和廟成五月己巳城陽王鸞赭陽失利降爲定襄縣王廣川王

諧薨庚午遷文成皇后馮氏神主于太和廟甲戌行幸
滑臺丙子次于石濟庚辰皇太子朝於平桃城高麗吐
谷渾國並遣使朝貢癸未車駕至自南伐告于太廟甲
申減閑官祿以裨軍國之用乙酉行飲至之禮班賜有
差甲午皇太子冠於廟六月己亥詔不得以北俗之語
言於朝廷若有違者免所居官辛丑詔復軍士從駕渡
淮者租賦三年癸卯詔皇太子赴平城宮壬子詔濟州
東郡滎陽及河南諸縣車駕所經者百年以上賜假縣
令九十以上賜爵三級八十以上賜爵二級七十以上
賜爵一級孤老鰥寡不能自存賜以穀帛孝悌廉義文

武應求者具以名聞癸丑詔求天下遺書祕閣所無有
裨益時用者加以優賞乙卯曲赦梁州復民田租三歲
丙辰詔遷洛之民死葬河南不得還北於是代人南遷
者悉爲河南洛陽人戊午詔改長尺大斗依周禮制度
班之天下八月甲辰幸西宮路見壞冢露棺駐輦殮之
乙巳詔選天下武勇之士十五萬人爲羽林虎賁以充
宿衛丁巳詔諸從兵從征被傷者皆聽還本金墉宮成
甲子引羣臣歷宴殿堂九月庚午六宮及文武盡遷洛
陽丙戌行幸鄴丁亥詔曰諸有舊墓銘記見存昭然爲
時人所知者三公及位從公者去墓三十步尚書令僕

九列十五步黃門五校十步各不聽墾殖壬辰遣黃門
郎以太牢祭比干之墓乙未車駕還宮冬十月甲辰曲
赦相州民百年以上假郡守九十以上假縣令八十以
上賜爵三級七十以上賜爵二級孤老痼疾不能自存
者賜以穀帛丙辰車駕至自鄴辛酉詔州郡諸有士庶
經行脩敏文思適逸才長吏治堪幹政事者以時發遣
壬戌詔諸州牧精品屬官考其得失爲三等之科以聞
將親覽而升降焉詔徐兗光南青荆洛六州纂嚴戎備
應須赴集十有二月行幸委粟山議定園丘甲申有事
於園丘丙戌大赦天下十有二月乙未朔引見羣臣於

光極堂宣示品令爲大選之始辛酉驃騎大將軍司州牧咸陽王禧爲長兼太尉前南安王楨復本封以特進廣陵王羽爲征東大將軍開府儀同三司青州刺史甲子引見羣臣於光極堂班賜冠服

二十年春正月丁卯詔改姓爲元氏壬辰改封始平王勰爲彭城王以定襄縣王鸞復封城陽王二月辛丑帝幸華林聽訟於都亭壬寅詔自非金革聽終三年喪丙午詔畿內七十以上暮春赴京師將行養老之禮庚戌幸華林聽訟於都亭癸丑詔介山之邑聽爲寒食自餘禁斷三月丙寅宴羣臣及國老庶老於華林園詔國老

黃考以上假中散大夫郡守耆年以上假給事中縣令
庶老直假郡縣各賜鳩杖衣裳丁丑詔諸州中正各舉
其鄉之民望年五十以上守素衡門者授以令長夏四
月甲辰廣州刺史薛法護南叛五月丙子詔曰農惟政
首稷實民先澍雨豐洽所宜敦勵其令畿內嚴加課督
墮業者申以楚撻力田者具以名聞丙戌初營方澤於
河陰遣使者以太牢祭漢光武及明章三帝陵又詔漢
魏晉諸帝陵各禁方百步不得樵蘇踐蹋丁亥車駕有
事於方澤七月廢皇后馮氏戊寅帝以久旱咸秩羣神
自癸未不食至于乙酉是夜澍雨大洽丁亥詔曰炎陽

爽節秋零卷澍在予之責實深悚慄故輟膳三晨以命
上訴靈鑒誠款曲流雲液雖休勿休寧敢愆怠將有賢
人湛德高士凝棲雖加銓採未能招致其精訪幽谷舉
茲賢彥直言極諫匡予不及又邪佞毀朝固唯治蠹貪
夫竊位大政以虧主者彈劾不肖明黜盜祿又法爲治
要民命尤重在京之囚悉命條奏朕將親案以時議決
又疾苦六極人神所矜宜時訪恤以拯窮廢鰥寡困乏
不能自存者明加矜恤令得存濟又輕徭薄賦君人常
理歲中恒役具以狀聞又夫婦之道生民所先仲春奔
會禮有達式男女失時者以禮會之又京民始業農桑

爲本田稼多少課督不具以狀言八月壬辰朔幸華林園親錄囚徒咸降本罪二等決遣之戊戌車駕幸嵩高甲寅還宮丁巳南安王楨薨幸華林園聽訟九月戊辰車駕閱武於小平津癸酉還宮丁亥將通洛水入穀帝親臨觀冬十月戊戌以代遷之士皆爲羽林虎賁司州之民十二夫調一吏爲四年更卒歲開番假以供公私力役己酉曲赦京師十有一月乙酉復封前汝陰王天賜孫景和爲汝陰王前京兆王太興爲西河王閏月丙辰右將軍元隆大破汾州叛胡十有二月甲子以西北州郡旱儉遣侍臣循察開倉賑恤乙丑開鹽池之禁與

民共之丙寅廢皇太子恂爲庶人丁卯告太廟戊辰置常平倉恒州刺史穆泰等在州謀反遣行吏部尚書任城王澄案治之樂陵王思譽坐知泰陰謀不告削爵爲庶人

二十有一年春正月丙申立皇子恪爲皇太子賜天下爲父後者爵一級己亥遣兼侍中張彝崔光兼散騎常侍劉藻巡方省察問民疾苦黜陟守宰宣揚風化乙巳車駕北巡二月壬戌次於太原親見高年問所不便乙丑詔并州士人年六十已上假以郡守先是定州民王金鈞訛言惑衆自稱應王丙寅州郡捕斬之癸酉車駕

至平城甲戌謁永固陵癸未行幸雲中三月庚寅車駕
至自雲中辛卯謁金陵乙未車駕南巡己酉次離石叛
胡歸罪宥之甲寅詔汾州民百年以上假縣令九十以
上賜爵三級八十以上賜爵二級七十以上賜爵一級
丙辰車駕次平陽遣使者以太牢祭唐堯夏四月庚申
幸龍門遣使者以太牢祭夏禹癸亥行幸蒲坂遣使者
以太牢祭虞舜戊辰詔脩堯舜夏禹廟辛未行幸長安
壬申武興王楊集始來朝乙亥親見高年問所疾苦丙
子遣侍臣分省縣邑賑賜穀帛戊寅幸未央殿阿房宮
遂幸昆明池癸未大將軍宋王劉昶薨丙戌遣使者以

太牢祀漢帝諸陵五月丁亥朔衛大國遣使朝貢己丑
車駕東旋汎渭入河庚寅詔雍州士人百年以上假華
郡太守九十以上假荒郡八十以上假華縣令七十以
上假荒縣庶老以年各減一等七十以上賜爵三級其
營船之夫賜爵一級孤寡鰥貧窮痾廢疾各賜帛二匹
穀五斛其孝友德義文學才幹悉仰貢舉壬辰遣使者
以太牢祭周文王於鄠祭武王於鎬癸卯遣使祭華嶽
六月庚申車駕至自長安壬戌詔冀定瀛相濟五州發
卒二十萬將以南討癸亥司空穆亮遜位丁卯部分六
師以定行留秋七月甲午立昭儀馮氏爲皇后戊辰以

前司空穆亮爲征北大將軍開府儀同三司冀州刺史
甲寅帝親爲羣臣講喪服於清徽堂八月丙辰詔中外
戒嚴壬戌立皇子愉爲京兆王擇爲清河王懷爲廣平
王壬申行幸河南城甲戌講武於華林園庚辰車駕南
討九月丙申詔曰哀貧恤老王者所先鰥寡六疾尤宜
矜愍可勅司州洛陽之民年七十已上無子孫六十以
上無菽親貧不自存者給以衣食及不滿六十而有廢
痼之疾無大功之親窮困無以自療者皆於別坊遣醫
救護給醫師四人豫請藥物以療之丁酉詔河南尹李
崇討梁州叛羌受征西源懷節度辛丑帝留諸將攻赭

陽引師而南癸卯至宛城夜襲其郛克之丁未車駕發
南陽留太尉咸陽王禧前將軍元英攻之己酉車駕至
新野冬十月丁巳四面進攻不克詔左右軍築長圍以
守之乙亥追廢貞皇后林氏爲庶人十有一月甲午蕭
鸞前軍將軍韓秀方弋陽太守王副之後軍將軍趙祖
悅等十五將來降丁酉大破賊軍於沔北獲其將軍王
伏保等於是民皆復業九十以上假以郡守六十五以
上假以縣令新野民張睹柵萬餘家拒守不下十有二
月庚申破之俘斬萬餘丁卯詔流徒之囚皆勿決遣有
登城之際令其先鋒自效庚午車駕臨沔遂巡沔東還

戊寅車駕還新野己卯親行營壘隱恤六軍蕭鸞將王
曇紛等萬餘人寇南青州黃郭戍戍主崔僧淵擊破之
悉虜其衆以齊郡王子琛紹河間王若後高昌國遣使
朝貢

二十有二年春正月癸未朔朝饗羣臣於新野行宮丁
亥拔新野獲蕭鸞輔國將軍新野太守劉忌斬之於宛
戊子鸞湖陽戍主蔡道福棄城遁走辛卯鸞赭陽戍主
成公期軍主胡松棄城遁走壬辰鸞輔國將軍舞陰戍
主黃瑤起及直閣將軍臺軍主鮑舉南鄉太守席謙相
尋遁走瑤起鮑舉爲軍人所獲送庚戌行幸南陽二月

乙卯進攻宛北城甲子拔之鸞冠軍將軍南陽太守房伯玉面縛出降庚午車駕幸新野辛未詔以穰民首歸大順終始若一者給復三十年標其所居曰歸義鄉次降者給復十五年三月壬午朔大破鸞平北將軍崔惠景黃門郎蕭衍軍於鄧城斬獲首虜二萬有餘庚寅行幸樊城觀兵襄沔耀武而還曲赦二荆魯陽郡鎮南將軍王肅攻鸞義陽鸞遣將裴叔業寇渦陽乙未詔將軍鄭思明嚴虛敬宇文福等三軍繼援辛丑行幸湖陽乙未次比陽戊申詔荊州諸郡之民初降次附復同穰縣辛亥行幸懸瓠夏四月甲寅從征武直之官進位三階

文官二級外官一階庚午發州郡兵二十萬人限八月
中旬集懸瓠趙郡王幹薨五月丙午詔在征身喪者四
品已下及卑兼之職給帛有差六月庚申詔諸王將士
戰沒皆加優贈秋七月壬午詔曰朕以寡德屬茲靖亂
實賴羣英凱清南夏宜約躬賞效以勸茂績后之私府
便可損半六宮嬪御五服男女常恤恒供亦令減半在
戎之親三分省一是月蕭鸞死子寶卷僭立八月辛亥
皇太子自京師來朝壬子蕭寶卷奉朝請鄧學擁其齊
興郡內屬勅勒樹者相率反叛詔平北將軍江陽王繼
都督北討諸軍事以討之壬戌高麗國遣使朝獻九月

己亥帝以蕭鸞死禮不伐喪乃詔反旆庚子仍將北伐
叛虜丙午車駕發懸瓠冬十月己酉朔曲赦二豫殊死
已下復民田租一歲十有一月辛巳幸鄴十有二月甲
寅以江陽王繼定勅勒乃詔班師

二十有三年春正月戊寅朔朝羣臣以帝疾瘳上壽大
饗於澄鸞殿壬午幸西門豹祠遂歷漳水而還蕭寶卷
遣太尉陳顯達寇荊州癸未詔前將軍元英討之乙酉
車駕發鄴戊戌至自鄴庚子告於廟社癸卯行飲至策
勲之禮甲辰大赦天下太保齊郡王簡薨二月辛亥以
長兼太尉咸陽王禧爲正太尉癸亥以中軍大將軍彭

城王勰爲司徒復樂陵王思譽本封癸酉顯達攻陷馬
圈戊三月庚辰車駕南伐癸未次梁城甲申以順陽被
圍危急詔振武將軍慕容平城率騎五千赴之丙戌帝
不豫司徒彭城王勰侍疾禁中且攝百揆丁酉車駕至
馬圈詔鎮南大將軍廣陽王嘉斷均口邀顯達歸路戊
戌頻戰破之其夜顯達及崔惠景曹虎等宵遁己亥收
其戎資億計班賜六軍諸將追奔及於漢水斬獲及赴
水而死者十八九斬寶卷左軍將軍張于達等賊將蔡
道福成公期率數萬人棄順陽遁走庚子帝疾甚車駕
北次穀塘原甲辰詔賜皇后馮氏死詔司徒勰徵太子

於魯陽踐阼詔以侍中護軍將軍北海王詳爲司空公
鎮南將軍王肅爲尚書令鎮南大將軍廣陽王嘉爲尚
書左僕射尚書宋弁爲吏部尚書與侍中太尉公禧尚
書右僕射任城王澄等六人輔政顧命宰輔曰粵爾太
尉司空尚書令左右僕射吏部尚書惟我太祖丕丕之
業與四象齊茂累聖重明屬鴻歷於寡昧兢兢業業思
纂乃聖之遺蹤遷都嵩極定鼎河漕庶南蕩甌吳復禮
萬國以仰光七廟俯濟蒼生困窮早滅不永乃志公卿
其善毗繼子隆我魏室不亦善歟可不勉之夏四月丙
午朔帝崩於穀塘原之行宮時年三十三祕諱至魯陽

發哀還京師上諡曰孝文皇帝廟曰高祖五月丙申葬長陵帝幼有至性年四歲顯祖會患癰帝親自吮膿五歲受禪悲泣不能自勝顯祖問帝帝曰代親之感內切於心顯祖甚歎異之文明太后以帝聰聖後或不利於馮氏將謀廢帝乃於寒月單衣閉室絕食三朝召咸陽王禧將立之元丕穆泰李冲固諫乃止帝初不有憾唯深德丕等撫念諸弟始終會無纖介悖睦九族禮敬俱深雖於大臣持法不縱然性寬慈每垂矜捨進食者曾以熱羹傷帝手又曾於食中得蟲穢之物並笑而恕之宦者先有譖帝於太后太后大怒杖帝數十帝默然而

受不自申明太后崩後亦不以介意聽覽政事莫不從善如流哀矜百姓恒思所以濟益天地五郊宗廟二分之禮常必躬親不以寒暑爲倦尚書奏案多自尋省百官大小無不留心務於周洽每言凡爲人君患於不均不能推誠御物苟能均誠胡越之人亦可親如兄弟常從容謂史官曰直書時事無諱國惡人君威福自己史復不書將何所懼南北征巡有司奏請治道帝曰粗脩橋梁通輿馬便止不須去草剗令平也凡所脩造不得已而爲之不爲不急之事損民力也巡幸淮南如在內地軍事須伐民樹者必留絹以酬其直民稻粟無所傷

踐諸有禁忌禳厭之方非典籍所載者一皆除罷雅好
讀書手不釋卷五經之義覽之便講學不師受探其精
與史傳百家無不該涉善談莊老尤精釋義才藻富贍
好爲文章詩賦銘頌任興而作有大文筆馬上口授及
其成也不改一字自太和十年已後詔冊皆帝之文也
自餘文章百有餘篇愛奇好士情如飢渴待納朝賢隨
才輕重常寄以布素之意悠然立邁不以世務嬰心又
少而善射有膂力年十餘歲能以指彈碎羊髀骨及射
禽獸莫不隨所志斃之至年十五便不復殺生射獵之
事悉止性儉素常服澣濯之衣鞞勒鐵木而已帝之雅

志皆此類也

史臣曰有魏始基代朔廓平南夏闢壤經世咸以威武
爲業文教之事所未遑也高祖幼承洪緒早著叡聖之
風時以文明攝事優游恭已立覽獨得著自不言神契
所標固以符於冥化及躬總大政一日萬機十許年間
曾不暇給殊途同歸百慮一致至夫生民所難行人倫
之高迹雖尊居黃屋盡蹈之矣若乃欽明稽古協御天
人帝王制作朝野軌度斟酌用捨煥乎其有文章海內
生民咸受耳目之賜加以雄才大略愛奇好士視下如
傷役已利物亦無得而稱之其經緯天地豈虛諡也

魏書卷七下

魏書卷七下考證

高祖紀征西大將軍陽平王熙擊走之。臣人龍按熙

本傳泰常六年薨距太和十四年薨已五六十餘年矣考天象志地豆于頻犯塞詔征西大將軍陽平王頤擊走之蓋熙與頤俱稱陽平王音復相近是以訛也

詔罷祖裸疑。臣照按詔罷祖裸句無上下文舊本旁

注一疑字北史則作詔罷祖裸但果禁民袒裸則當云禁不當云罷祖裸字亦復可疑或是拓跋國語有音無字當時則其文自明而今不可考耶

魏書卷七下考證

魏書卷八

齊

魏

收

撰

帝紀第八

世宗紀

世宗宣武皇帝諱恪高祖孝文皇帝第二子母曰高夫人初夢爲日所逐避於牀下日化爲龍繞已數匝寤而驚悸旣而有娠太和七年閏四月生帝於平城宮二十一年正月丙申立爲皇太子二十三年夏四月丁巳卽皇帝位于魯陽大赦天下帝居諒闇委政宰輔五月丙子朔高麗國遣使朝貢六月乙卯分遣侍臣巡行郡國

問民疾苦考察守令黜陟幽明文武應求道著丘園者
皆加褒禮戊辰追尊皇妣日文昭皇后秋八月戊申遵
遺詔高祖三夫人已下悉歸家癸丑宮臣增位一級癸
亥南徐州刺史沈陵南叛冬十月辛未鄧至國王像舒
彭來朝丙戌車駕謁長陵丁酉有事於太廟十有一月
幽州民王惠定聚衆反自稱明法皇帝刺史李肅捕斬
之是歲州鎮十八水民飢分遣使者開倉賑恤高麗國
遣使朝獻

景明元年春正月壬寅車駕謁長陵乙巳大赦改年丁
未蕭寶卷豫州刺史裴叔業以壽春內屬驃騎大將軍

彭城王勰帥車騎十萬赴之二月戊戌復以彭城王勰爲司徒寶卷將胡松李居士率衆萬餘屯宛陳伯之水軍泝淮而上以逼壽春夏四月丙申彭城王勰車騎將軍王肅大破之斬首萬數己亥皇弟恍薨五月甲寅以北鎮大饑遣兼侍中楊播巡撫賑恤六月丙子司徒彭城王勰進位大司馬車騎將軍王肅加開府儀同三司癸未大陽蠻酋田育丘等率戶內附秋七月寶卷又遣陳伯之寇淮南庚子吐谷渾國遣使朝獻八月乙酉彭城王勰破伯之於肥口乙未高麗國遣使朝貢九月乙丑東豫州刺史田益宗破寶卷將吳子陽鄧元起於長

風齊州民柳世明聚衆反冬十月丁卯朔車駕謁長陵
庚寅齊堯二州討世明平之丁亥改授彭城王勰爲司
徒錄尚書事甲午詔壽春置兵四萬人十有一月己亥
荊州刺史桓道進攻寶卷下笮戍拔之降者二千餘戶
丁巳陽平王頤薨是歲十七州大饑分遣使者開倉賑
恤是冬、島夷蕭衍起兵東下伐其主蕭寶卷

二年春正月丙申朔車駕謁長陵庚戌帝始親政遵遺
詔聽司徒彭城王勰以王歸第太尉咸陽王禧進位太
保司空北海王詳爲大將軍錄尚書事丁巳引見羣臣
於太極前殿告以覽政之意辛酉高麗國遣使朝獻王

戊以太保咸陽王禧領太尉大將軍廣陵王羽爲司徒
詔曰朕幼承寶曆艱憂在疚庶事不親風化未洽今始
覽政務義協惟新思使四方風從率善可分遣大使黜
陟幽明二月庚午宿衛之官進位一級甲戌大赦天下
三月乙未朔詔曰比年以來連有軍旅役務旣多百姓
彫敝宜時矜量以拯民瘼正調之外諸妨害損民一時
蠲罷辛亥詔曰諸州刺史不親民事緩於督察郡縣稽
逋旬月之間纔一覽決淹獄久訟動延時序百姓怨嗟
方成困敝尙書可明條制申下四方令日親庶事嚴勒
守宰不得因循寬怠虧政壬戌詔曰治尙簡靜任貴應

事州府佐史除板稍多方成損敝無益政道又京師百
司寮局殷雜官有閑長者亦同此例苟非稱要悉從蠲
省青齊徐兗四州大饑民死者萬餘口是月蕭衍立寶
卷弟南康王寶融爲主年號中興東赴建業夏五月壬
子廣陵王羽薨壬戌太保咸陽王禧謀反賜死六月丁
亥考諸州刺史加以黜陟秋七月乙巳蠕蠕犯塞乙未
東豫州刺史田益宗破蕭寶卷將黃天賜於赤亭辛酉
大赦天下壬戌車騎將軍儀同三司王肅薨九月丁酉
發畿內夫五萬五千人築京師三百二十三坊四旬而
罷己亥立皇后于氏乙卯免壽春營戶爲揚州民冬十

月丁卯吐谷渾國遣使朝獻辛未蕭寶卷零陵戍王華
候率戶內屬十有一月丙申以驃騎大將軍穆亮爲司
空丁酉大將軍北海王詳爲太傅領司徒壬寅改築園
丘於伊水之陽乙卯仍有事焉十二月高麗國遣使朝
貢是月寶卷直後張齊殺其主寶卷降蕭衍衍克建業
三年春二月戊寅詔曰自比陽旱積時農民廢殖寤言
增愧在予良多申下州郡有骸骨暴露者悉可埋瘞三
月魯陽蠻反蕭寶卷弟建安王寶夤來降夏四月詔撫
軍將軍李崇討魯陽反蠻是月蕭衍又廢其主寶融而
僭立自稱曰梁閏月丁巳司空穆亮薨五月揚州小峴

戊午党法宗襲蕭衍大峴戍破之擒其龍驤將軍邾菩
薩送之京師秋七月癸酉于闐國遣使朝獻詔加文官
從征顯達宿衛者二階閑散者一階八月癸卯蕭寶融
鎮南大將軍江州刺史陳伯之遣使請降乙卯以前太
傅平陽公丕爲三老九月丁巳車駕行幸鄴丁卯詔使
者弔殷比干墓戊寅閱武於鄴南庚辰武興國世子楊
紹先遣使朝獻冬十月庚子帝親射遠及一里五十步
羣臣勒銘於射所甲辰車駕還宮十有一月己卯詔京
洛兵蕪歲踰十紀先皇定鼎舊都惟新魏曆翦掃榛荒
荆茲雲構鴻功茂績規模長遠今廟社乃建宮極斯崇

便當以來月中旬蠲吉徙御仰尋遺意感慶交衷既禮
盛周宣斯干之制事高漢祖壯麗之儀可依典故備茲
考告以稱遐邇人臣之望十有二月戊子詔曰民本農
桑國重蠶籍桑盛所憑冕織攸寄比京邑初基耕桑暫
缺遺規往旨宜必祇修今寢殿顯成移御維始春郊無
遠拂羽有辰便可表營千畝開設宮壇秉耒援筐躬勸
億兆壬寅饗羣臣于太極前殿賜布帛有差以初成也
甲辰揚州破蕭衍將張囂之斬級二于是歲疏勒剽賓
婆羅捺烏菴阿喻陀羅婆不喻陀拔羅弗波女提斯羅
達舍伏耆奚那太羅槃烏稽悉萬斤朱居槃訶盤陀撥

斤厭味朱泚洛南天竺持沙那斯頭諸國並遣使朝貢
河州大饑死者二千餘口

四年春正月乙亥車駕籍田於千畝梁州氏楊會反詔
行梁州事楊椿左將軍羊祉討之三月己巳皇后先蠶
於北郊庚辰揚州破蕭衍將於陰山斬其龍驤將軍吳
道爽等數千級夏四月癸未朔以蕭寶夤爲鎮東將軍
東揚州刺史封丹陽郡開國公齊王庚寅南天竺國獻
辟支佛牙戊戌詔曰酷吏爲禍綿古同患孝婦淫刑東
海焦壤今不雨十旬意者其有寃獄乎尙書鞠京師見
囚務盡聽察之理己亥帝以旱減膳徹懸辛丑澍雨大

洽五月甲戌楊椿羊祉大破反氏斬首數千級六月壬午朔封皇弟悅爲汝南王丙戌發冀定瀛相并濟六州二萬人馬千疋增配壽春秋七月乙卯三老平陽公元丕薨庚午詔還收鹽池利以入公辛未以彭城王勰爲太師八月庚子以吏部尚書元英假鎮南將軍攻蕭衍義陽勿吉國貢楛矢辛丑行幸河南城離宮冬十有一月壬子揚州大破蕭衍軍斬其徐州刺史潘佃憐擒司馬明素己未以武興國世子楊紹先爲其國王癸亥詔尙書左僕射源懷撫勞代都北鎮隨方拯恤乙亥鎮南將軍元英大破蕭衍將吳子陽於白沙擒斬千數十有

二月庚寅詔鎮南將軍李崇討東荆反蠻丙申詔曰先朝制立軌式庶事惟允但歲積人移物情乖惰比或擅有增損廢墜不行或守舊遺宜時有舛妨或職分錯亂互相推委其下百司列其疑闕速以奏聞癸卯蕭衍梁州刺史平陽縣開國侯翟遠徐州刺史永昌縣開國侯陳虎牙降

正始元年春正月庚戌江州刺史曲江公陳伯之破蕭衍將趙祖悅於東關丙辰東荆州刺史楊大眼大破羣蠻樊季安等丙寅大赦改年二月戊子蕭衍將姜慶真襲陷壽春外郭州軍擊走之丁酉揚州統軍劉思祖大

破衍衆於邵陽擒其冠軍將軍邵陽縣開國侯張惠紹
驃騎將軍祁陽縣開國男趙景悅等十將斬獲數千級
三月壬申元英破衍將王僧炳於樊城夏四月辛卯高
麗國遣使朝獻五月丁未朔太傅北海王詳以罪廢爲
庶人六月以旱徹樂減膳癸巳詔曰朕以匪德政刑多
舛陽旱歷旬京甸枯瘁在于之責夙宵疚懷有司可循
案舊典祇行六事囹圄寃滯平處決之庶尹廢職重加
脩舉鰥寡困窮在所存恤役賦殷煩咸加蠲省賢良謹
直以禮進之貪殘佞諛時加屏黜男女怨曠務今媾會
稱朕意焉甲午帝以旱親薦享於太廟戊戌詔立周旦

夷齊廟於首陽山庚子以旱見公卿已下引咎責躬又錄京師見囚殊死已下皆減一等鞭杖之坐悉皆原之秋七月癸丑蕭衍角城戍主柴慶宗以城來降李崇大破諸蠻帥樊素安八月丙子元英破蕭衍將馬仙琕於義陽詔洛陽令有大事聽面敷奏乙酉元英攻義陽拔之擒送蕭衍冠軍將軍蔡靈恩等十餘將辛卯英又大破衍將仍清三關丁酉封元英爲中山王戊戌西羌宋萬率戶四千內附九月丙午詔緣淮南北所在鎮戍皆令及秋播麥春種粟稻隨其土宜水陸兼用必使地無遺利兵無餘力比及來稔令公私俱濟也又詔諸州獨

停徭役不得橫有徵發甲子詔中山王英所執蕭衍冠軍將軍監司州事蔡靈恩等隨才擢敘乙丑蕭衍霍州刺史田道龍義州刺史張宗之遣使內附蠕蠕犯塞詔左僕射源懷討之冬十月乙未詔斷羣官白衣募吏十有一月戊午詔曰古之哲王躬業垂統安民立化莫不崇建膠序開訓國胄昭宣三禮崇明四術使道暢羣邦風流萬宇自皇基徙構光宅中區軍國務殷未遑經建靖言思之有慙古烈可勅有司依漢魏舊章營繕國學十有二月丙子以苑牧公田分賜代遷之戶己卯詔羣臣議定律令己亥行幸伊闕閏月癸卯朔蕭衍行梁州

事夏侯道遷據漢中來降假尚書邢巒鎮西將軍率衆
以赴之乙丑驃騎大將軍高陽王雍爲司空尚書令廣
陽王嘉加儀同三司

二年春正月丙子以宕昌國世子梁彌博爲其國王鄧
至國遣使朝貢二月梁州氏反絕漢中運路刺史邢巒
頻大破之夏四月己未城陽王鸞薨乙丑詔曰任賢明
治自昔通規宣風贊務實惟多士而中正所銓但存門
第吏部彝倫仍不才舉遂使英德罕昇司務多滯不精
厥選將何考陟八座可審議往代貢士之方擢賢之體
必令才學並申資望兼致丙寅以仇池氏叛詔光祿大

夫楊椿假平西將軍率衆以討之邢巒遣統軍王足西
伐頻破蕭衍諸軍遂入劔閣執行輔國將軍范始男送
京師五月辛巳氏賊關李虎率衆降六月己丑詔曰先朝

勳臣或身罹譴黜子孫沉滯或宦途失次有替舊流因
而弗採何以獎勸言念前績情有親疎宗及庶族祖曾
功績可紀而無朝官有官而才堪優引者隨才銓授甲
寅蕭衍冠軍將軍李旼等置營始平郡東涪水之北王
足逆擊敗之斬衍冠軍將軍張湯輔國將軍馬市寧朔
將軍李當姜見祖輔國將軍馮文豪龍驤將軍何營之
等甲子詔尙書李崇太府卿于忠散騎常侍游肇諫議

大夫鄧美崇忠使持節並兼侍中美兼黃門俱爲大使
糾斷外州畿內其守令之徒咎失彰露者卽便施決州
鎮重職聽爲表聞乙丑蕭衍冠軍將軍王景胤輔國將
軍魯方達等攻竹亭王足大破之斬其輔國將軍王明
達龍驤將軍張方熾丁卯揚州刺史薛真度大破蕭衍
將王超宗俘斬三千級戊辰蕭衍將魯方達屯戍新城
足又遣統軍盧祖遷等擊敗之斬衍冠軍將軍楊伯仁
寧朔將軍任安定秋七月甲戌詔曰朕纂馭寶曆於今
七載德澤未敷鑒不燭遠人之寃瘼所在猶滋而糾察
之獄未暢于下賢愚靡分皂白均貫非所以革民耳目

使善惡勵心今分遣大使省方巡檢隨其愆負與風響相符者卽加糾黜以明雷霆之威以申旄軒之舉因以觀風辨俗採訪功過褒賞賢者糾罰淫慝理窮恤弊以稱朕心戊子王足擊破蕭衍軍斬其龍驤將軍喻增暉寧朔將軍庫保壽輔國將軍魯天惠建武將軍王文標王足逼涪城壬辰蕭衍巴西太守庾域冠軍將軍統軍主李暉等逆戰足擊破之俘斬千數八月壬寅詔中山王英南討襄沔庚戌王足遣統軍紀洪雅盧祖遷等攻破衍軍斬其秦梁二州刺史魯方達等十五人壬子王足又遣統軍盧祖遷等擊破衍軍斬其都督冠軍將軍

梓潼縣開國子王景胤劉達等二十四將軍甲寅揚州擊行將姜慶真於羊石破之是月衍沔東太守田青喜率郡七縣三十一戶萬九十內附九月己巳揚州刺史元嵩擊破衍湘州刺史楊公則等斬獲數千冬十有一月戊辰朔武興國王楊紹先叔父集起謀反詔光祿大夫楊椿討之王足圍涪城益州諸郡戍降者十二三民送編籍者五萬餘戶旣而足引軍而退十有二月庚申又詔驃騎大將軍源懷慎令討武興反氐

三年春正月丁卯朔皇子生大赦天下壬申梁秦二州刺史邢巒連破氐賊克武興蕭衍冀州刺史桓和入寇

南青州州軍擊走之秦州民王智等聚衆二千自號王公尋推秦州主簿呂苟兒爲主年號建明己卯楊集起兄弟相率降二月丙辰詔曰昔虞戒面從昌言屢進周任諫輔王闕必箴朕仰積鴻基伏膺寶曆思康庶績一日萬幾是以側望忠言虛求讜直而良策弗進規畫無聞豈所謂弼諧元首匡救不逮者乎可詔王公已下其有嘉謀深圖直言忠諫利國便民矯時厲俗者咸令指事陳奏無或依違戊午詔右衛將軍元麗等討呂苟兒乙丑平南將軍陳伯之破蕭衍徐州刺史昌義之於梁城是月衍將蕭昶率衆五萬寇淮陽三月己巳以戎旅

大興詔罷諸作己卯詔荊州刺史趙怡平南將軍奚康
生赴淮陽樂浪王長命坐殺人賜死國除戊子名皇子
曰昌庚寅平南將軍曲江縣開國公陳伯之自梁城南
奔夏四月乙未詔罷鹽池禁甲辰詔遣使者巡慰北邊
會庶庚戌以中山王英爲征南將軍都督楊徐二道諸
軍事指授邊將蕭衍江州刺史王茂先寇荊州屯於河
南城詔平南將軍楊大眼討之辛酉大破之斬其輔國
將軍王花首虜二千餘進攻河南城茂先逃潰追奔至
於漢水拔其五城將軍宇文福略衍司州俘獲千餘口
而還五月乙丑朔詔尙書拯義陽初附之戶丙寅詔曰

掩骼埋胔古之令典順辰修令朝之恒式今時澤未降
春稼已旱或有孤老餒疾無人贍救因以致死暴露溝
塹者洛陽部尉依法棺埋壬申蕭衍將張惠紹入寇陷
宿豫乙亥衍將蕭容陷梁城辛巳衍將韋叡陷合肥城
壬午詔尙書元遙率衆南討癸未以秦隴未平詔征西
將軍于勁節度諸軍己丑衍將又陷羊石霍丘二城六
月辛丑又陷小岷戌乙巳安西將軍元麗大破秦賊斬
賊帥王智五人梟首六千丁未假平南將軍奚康生破
蕭衍將張惠紹斬其徐州刺史宋黑丁巳詔尙書邢巒
出討徐兗秋七月丙寅衍將桓和寇孤山陷固城庚辰

元麗大破秦賊降呂苟兒及其王公三十餘人秦涇二
州平戊子中山王英大破衍徐州刺史王伯敖於陰陵
斬其將二十五人首虜五千有餘己丑詔發定冀瀛相
并肆六州十萬人以濟南軍八月壬寅安東將軍邢巒
破蕭衍將桓和於孤山斬首萬餘級將軍元恒別克固
城斬衍冠軍將軍桓方慶統軍畢祖朽別克蒙山斬衍
龍驤將軍矯道儀等斬賊及赴沂死者四千餘人兗州
平己酉詔平南將軍安樂王詮督後發諸軍以赴淮南
壬戌曲赦涇秦岐涼河五州九月癸酉邢巒大破衍軍
於宿豫斬其大將藍懷恭等四十餘人張惠紹棄宿豫

蕭昞棄淮陽南走追斬數萬級徐州平己丑中山王英
大破衍軍於淮南衍中軍大將軍臨川王蕭宏尚書右
僕射柳惔徐州刺史昌義之等棄梁城沿淮東走追奔
次於馬頭衍冠軍將軍戍主朱思遠棄城宵遁擒送衍
將四十餘人斬獲士卒五萬有餘英遂攻鍾離高麗國
遣使朝貢蕭衍遣將士卒三萬寇義陽丁酉夜遁走郢
州刺史婁悅追擊破之戊申蠕蠕國遣使朝貢己未征
虜將軍趙遐大破衍衆於灑城桑坪十有一月甲子帝
爲京兆王愉清河王懌廣平王懷汝南王悅講孝經於
式乾殿庚寅詔曰往歲隴右扇逆合境不民其中猶有

卒能自守無豫釁亂疾風知勁良在可嘉尙書可甄量報賞以表誠義是月梁州再破反獠

四年春二月丙午吐谷渾宕昌國並遣使朝獻己未勿吉國貢楛矢三月丙子疊伏羅國遣使朝貢夏四月戊戌鍾離大水中山王英敗績而還壬寅吐谷渾鳩磨羅阿拔磨拔切磨勒悉萬斤諸國並遣使朝獻夏六月己丑朔詔曰高祖德格兩儀明並日月播文教以懷遠人調禮學以旌僞造徙縣中區光宅天邑總霜露之所均一姬卜於洛涘戎繕兼興未遑儒教朕纂承鴻緒君臨寶曆思模聖規述遵先志今天平地寧方隅無事可勅

有司準訪前式置國子立太學樹小學於四門丙午蕭衍龍驤將軍馮翊太守宇文子生等七郡相率內附丁未社蘭達那羅舍彌比羅直諸國並遣使朝獻秋八月辛卯契丹國遣使朝獻己亥中山王英齊王蕭寶夤坐鍾離敗退並除名爲民庚子庫莫奚宕昌吐谷渾諸國遣使朝獻辛丑敦煌民飢開倉賑恤九月己未詔曰朕秉曆承天履年將紀徙正宮極歲浹歸餘台懿茂親祗勤已久列司英彥庸績未酬非所謂有功見知賞以時及其以司空高陽王雍爲太尉尙書令廣陽王嘉爲司空百官悉進位一級庚申夏州長史曹明謀反伏誅甲

子開斜谷舊道疏勒車勒阿駒南天竺婆羅等諸國遣使朝獻丙戌司州民飢開倉賑恤閏月甲午禁大司馬門不得車馬出入冬十月丁巳高麗半社悉萬斤可流伽比沙疏勒于闐等諸國並遣使朝獻丁卯皇后于氏崩戊辰疏勒國遣使朝貢庚午淮陽太守安樂以城南叛辛未嚙噠波斯渴槃陁渴文提不那杖忸杖提等諸國並遣使朝獻乙酉葬順皇后於永泰陵十有一月丁未禁河南畜牝馬自碣石至於劔閣東西七千里置二十二都尉己酉阿與陁阿羅槃陁跋吐羅諸國並遣使朝獻十有二月戊午詔兵士鍾離没落者復一房出租

三年辛酉特那杖提莎鉢離阿失勒摩致鉢諸國遣使
朝貢甲子蠕蠕高車民他莫孤率部來降丁丑鉢嶮波
利伏佛胄善乾達諸國遣使朝貢

永平元年春正月戊戌潁川太守王神念奔於蕭衍二
月辛未勿吉南天竺國並遣使朝獻三月戊子皇子昌
薨己亥斯羅阿陀比羅阿夷义多婆那伽伽師達于闐
諸國並遣使朝獻丙午以去年旱儉遣使者所在調恤
夏四月阿伏至羅國遣使朝貢五月癸未高麗國遣使
朝獻辛卯帝以旱故減膳徹懸六月壬申詔曰慎獄重
刑著於往誥朕御茲寶曆明鑒未遠斷決煩疑實有攸

愧可依洛陽舊圖修聽訟觀農隙起功及冬令就當與
王公卿士親臨錄問癸酉高車國遣使朝貢秋七月辛
卯高車契丹汗畔薊賓諸國並遣使朝獻甲午以夫人
高氏爲皇后乙未詔曰察獄以情審之五聽枷杖小大
各宜定準然比廷尉司州河南洛陽河陰及諸獄官鞠
訊之理未盡矜恕掠拷之苦每多切酷非所以祇憲量
衷慎刑重命者也推濫究枉良軫於懷可付尙書精檢
枷杖違制之由斷罪聞奏八月癸亥冀州刺史京兆王
愉據州反乙丑假尙書李平鎮北將軍行冀州事以討
之丁卯大赦改年庚午吐谷渾庫莫奚國並遣使朝貢

九月辛巳朔李平大破元愉於草橋丙戌復前中山王英本封壬辰蠕蠕國遣使朝貢定州刺史安樂王詮大破元愉於信都北戊戌殺侍中太師彭城王勰辛丑詔赦冀州民雜工役爲元愉所誣誤者其能斬獲逆黨別加優賞癸卯李平克信都元愉北走斬其所署冀州牧韋超右衛將軍睦雅尙書僕射劉子直吏部尙書崔肅等統軍叔孫頭執愉送信都羣臣請誅愉帝弗許詔送京師冀州平庚子郢州司馬彭珍治中督榮祖等謀叛潛引蕭衍衆入義陽郢州刺史婁悅擊走之詔將軍胡季智屈祖等南赴義陽三關戍王侯登陽鳳省等以城

南叛婁悅嬰城固守遣中山王英督步騎三萬以赴之
冬十月丁巳詔復故北海王詳本封葬以王禮豫州彭
城人白早生殺刺史司馬悅據城南叛蕭衍遣將齊苟
仁等四將以助之詔尙書邢巒行豫州事督將軍崔暹
率騎討之丙子邢巒大破早生及苟仁軍於鮑口丁丑
前宿豫戍主成安樂子景儁殺宿豫戍主嚴仲賢以城
南叛十有一月庚寅詔安東將軍楊椿率衆四萬攻宿
豫十有二月己未邢巒克懸瓠斬白早生擒齊苟仁等
俘蕭衍卒三千餘人分賜王公已下癸亥中山王英破
衍將於楚城擒衍寧朔將軍張疑等郢州刺史婁悅破

行將馬仙琕於金山壬申漢東蠻民一萬七千戶相率
內附丙子高麗國遣使朝獻是歲高昌國王麴嘉遣其
兄子私署左衛將軍孝亮奉表來朝因求內徙乞師迎
接二年春正月蕭衍遣王神念寇南兗詔輔國將軍長
孫稚假平南將軍爲都督率統軍郗虬等五軍以討之
丁亥胡密步就磨忸密槃是悉萬斤辛丑那越拔忸諸
國並遣使朝獻壬辰嚙噠薄知國遣使來朝貢白象一
乙未高昌國遣使朝貢丙申中山王英進逼蕭衍長薄
戊戌戌宵潰殺傷千數丁酉拔武陽關擒衍雲騎將軍
松滋縣開國侯馬廣冠軍將軍遷陵縣開國子彭瓮生

驍騎將軍當陽縣開國伯徐元季等二十六將俘獲七千餘人進攻黃峴西關行將馬仙琕棄西關李元履棄黃峴遁走是月涇州沙門劉惠注聚衆反詔華州刺史奚康生討之二月乙卯詔曰比軍役頻興仗多毀敗在庫戎器見有無幾安不忘危古人所戒五兵之器事須充積經造旣殷非衆莫舉今可量造四萬人雜仗三月癸未磨豆羅阿曜社蘇突闌地伏羅諸國並遣使朝獻夏四月己酉詔以武川鎮饑開倉賑恤甲子詔曰聖人濟世隨物汗隆或正或權理無恒在先朝以雲駕甫遷嵩基始構河洛民庶徙舊未安代來新宅尙不能就伊

關西南羣蠻填聚沔陽賊城連邑作戍蠢爾愚巴心未
純款故暫抑造育之仁權緩肅姦之法今京師天固與
昔不同揚郢荆益皆悉我有保險諸蠻罔不歸附商洛
民情誠倍往日唯樊襄已南仁乖道政被拘隔化非民
之咎而無賴之徒輕相劫掠屠害良善離人父兄衍之
爲酷實亦深矣便可放彼掠民示其大惠捨此殘賊未
令之愆并勅緣邊州鎮自今已後不聽境外寇盜犯者
罪同境內若州鎮主將知容不糾坐之如律五月高麗
國遣使朝獻辛丑帝以旱故減膳徹懸禁斷屠殺甲辰
幸華林都亭親錄囚徒犯死罪已下降一等六月高昌

國遣使朝獻辛亥詔曰江海方同車書宜一諸州軌轍
南北不等今可申勅四方使遠近無二秋七月癸未契
丹國遣使朝獻八月丁未鄧至國遣使朝獻戊申以鄧
至國世子像覽蹄爲其國王高昌勿吉庫莫奚諸國並
遣使朝獻九月辛巳封故北海王子顯爲北海王壬午
詔定諸門闕名冬十月癸丑以司空廣陽王嘉爲司徒
庚午鄧州獻七寶牀詔不納十有一月甲申詔禁屠殺
含孕以爲永制己丑帝於式乾殿爲諸僧朝臣講維摩
詰經十有二月詔曰五等諸侯比無選式其同姓者出
身公正六下侯從六上伯從六下子正七上男正七下

異族出身公從七上侯從七下伯正八上子正八下男
從八上清脩出身公從八下侯正九上伯正九下子從
九上男從九下可依此敘之疊伏羅弗菩提朝陁咤波
羅諸國並遣使朝獻

三年春二月丙午高昌鄧至國並遣使朝獻壬子秦州
沙門劉光秀謀反州郡捕斬之癸亥秦州隴西羌殺鎮
將趙儁阻兵反叛州軍討平之三月丙戌皇子生大赦
天下高麗吐谷渾宕昌諸國並遣使朝獻夏四月平陽
郡之禽昌襄陵二縣大疫自正月至此月死者二千七
百三十人五月丁亥詔以冀定二州旱儉開倉賑恤六

月壬寅詔重求遺書於天下丁卯名皇子曰詡閏月己亥吐谷渾高麗契丹諸國各遣使朝貢秋七月己未吐谷渾國遣使朝貢八月己卯勿吉國遣使朝貢九月壬寅烏菟秀沙尼諸國並遣使朝獻丙辰高車別帥可略汗等率衆一千七百內屬冬十月辛卯中山王英薨丙申詔曰朕乘乾御曆年周一紀而道謝擊壤教慙刑厝至於下民之熒鰥疾苦心常愍之此而不恤豈爲民父母之意也可勅太常於閑敞之處別立一館使京畿內外疾病之徒咸令居處嚴勅醫署分師療治考其能否而行賞罰雖齡數有期脩短分定然三疾不同或賴

針石庶秦扁之言理驗今日又經方浩博流傳處廣應
病投藥卒難窮究更令有司集諸醫工尋篇推簡務存
精要取三十餘卷以班九服郡縣備寫布下鄉邑使知
救患之術耳戊戌高車龜茲難地那竭庫莫奚等諸國
僉遣使朝獻十有二月己卯高麗比沙杖國遣使朝獻
辛巳江陽王繼坐事除名甲申詔於青州立高祖廟殿
中侍御史王敞謀反伏誅

四年春正月丁巳汾州劉龍駒聚衆反詔諫議大夫薛
和率衆討之甲子阿悅隨不數羅國僉遣使朝獻二月
壬午青齊徐兗四州民飢甚遣使賑恤三月癸卯婆比

幡彌烏菴比地乾達諸國並遣使朝獻壬戌司徒廣陽王嘉薨夏四月琅邪民王萬壽斬蕭衍輔國將軍琅邪東莞二郡太守劉晰首以胸山來降徐州刺史盧昶遣琅邪戍主傅文驥率衆據之甲戌薛和大破山胡蕭衍遣其鎮北將軍張稷及馬仙琕寇胸山詔盧昶率衆赴之五月己亥遷代京銅龍置天淵池丙辰詔禁天文之學六月乙亥乾達阿婆羅達舍越伽使密不流沙諸國並遣使朝獻秋七月辛酉吐谷渾契丹國並遣使朝獻八月辛未阿婆羅達舍越伽使密不流沙等諸國並遣使朝獻癸巳勿吉國獻楛矢九月甲寅蕭衍九山戍主

苟仁以成來降嘍噍朱居槃波羅莫伽陁移婆僕羅俱
薩羅舍彌羅樂陁等諸國並遣使朝獻冬十月丁丑婆
比幡彌烏萇比地乾達等諸國並遣使朝獻十有一月
甲午宕昌國遣使朝獻己亥詔李崇奚康生等治兵壽
春以分胸山之寇戊申難地伏羅國並遣使朝獻胸城
陷盧昶大敗而還十有二月壬申詔曰進善退惡治之
通規三載考察政之明典正始二年以來于今未考功
過難齊寧無昇降從景明二年至永平四年通考以聞
戊子大羅汗婆來伽國遣使朝獻

延昌元年春正月乙巳以頻水旱百姓飢敝分遣使者

開倉賑恤戊申疏勒國遣使朝獻丙辰以車騎大將軍
尙書令高肇爲司徒公光祿大夫清河王懌爲司空司
州牧廣平王懷進號驃騎大將軍儀同三司二月辛卯
朔渴槃隨國遣使朝獻甲午州郡十一大水詔開倉賑
恤以京師穀貴出倉粟八十萬石以賑貧者己未安樂
王詮薨夏四月詔以旱故食粟之畜皆斷之丁卯詔曰
遷京嵩縣年將二紀虎闐闕唱演之音四門絕講誦之
業博士端然虛祿歲祀貴遊之胄歎同子衿靖言念之
有兼愧慨可嚴勅有司國子學孟冬使成太學四門明
年暮春令就戊辰以旱詔尙書與羣司鞠理獄訟詔河

北民就穀燕恒二州辛未詔飢民就穀六鎮丁丑帝以
旱故減膳徹懸癸未詔曰肆州地震陷裂死傷甚多言
念毀沒有酸懷抱亡者不可復追生病之徒宜加療救
可遣大醫折傷醫并給所須之藥就治之乙酉大赦改
年詔立理訴殿申訟車以盡寃窮之理五月辛卯疏勒
及高麗國並遣使朝獻丙午詔天下有粟之家供年之
外悉貸飢民自二月不雨至於是晦六月壬申澍雨大
洽戊寅通河南牝馬之禁己卯詔曰去歲水災今春炎
旱百姓飢餒救命靡寄雖經蠶月不能養績今秋輸將
及郡縣期於責辦尙書可嚴勒諸州量民資產明加檢

校以救艱敝庚辰詔出太倉粟五十萬石以賑京師及州郡飢民秋七月吐谷渾契丹國並遣使朝獻八月壬戌吐谷渾國遣使朝貢丁亥勿吉國貢楛矢冬十月乙亥立皇子詡爲皇太子是月嚙噠于闐高昌及庫莫奚諸國並遣使朝獻十有一月丙申詔曰朕運承天休統御宸宇太子體藉靈明肇建宮華明兩旣孚三善方洽宜澤均率壤榮汎庶膺其賜天下爲父後者爵一級孝子順孫廉夫節婦旌表門閭量給粟帛十有二月己巳詔守宰爲御史所彈遇赦免者及考在中第皆代之二年春正月戊戌帝御申訟車親理寃訟高麗國遣使

朝獻二月丙辰朔賑恤京師貧民甲戌以六鎮大饑開倉賑贍己卯太尉高陽王雍進位太保庚辰蕭衍郁州民徐玄明等斬送行鎮北將軍青冀二州刺史張稷首以州內附詔前南兗州刺史樊魯率衆赴之閏二月辛丑以苑牧之地賜代遷民無田者癸卯定奴良之制以景明爲斷三月丙寅高昌國遣使朝獻是春民飢餓死者數萬口夏四月庚子以絹十五萬匹賑恤河南郡飢民五月壽春大水遣平東將軍奚康生等步騎數千赴之高麗國遣使朝獻六月乙酉青州民飢詔使者開倉賑恤甲午曲赦揚州辛亥帝御申訟車親理寃訟是夏

州郡十三大水秋八月辛卯詔曰頃水旱彘侵頻年饑
儉百姓窘弊多陷罪辜煩刑之愧朕用懼矣其殺人掠
賣人羣彊盜首及雖非首而殺傷財主曾經再犯公斷
道路劫奪行人者依法行決自餘恕死徒流已下各準
減降庚戌嘯噓于闐槃陁及契丹庫莫奚諸國並遣使
朝獻九月丙辰以貴族豪門崇習奢侈詔尚書嚴立限
級節其流宥是月勿吉吐谷渾鄧至國並遣使朝貢冬
十月詔以恒肆地震民多死傷蠲兩河一年租賦十有
二月丙戌巧洛陽河陰二縣租賦乙巳詔以恒肆地震
民多離災其有課丁沒盡老幼單辛家無受復者各賜

廩以接來稔高麗國遣使朝獻

三年春二月乙未詔曰肆州秀容郡敷城縣鴈門郡原平縣並自去年四月以來山鳴地震于今不已告譴彰咎朕甚懼焉祇畏兢兢若臨淵谷可恤瘼寬刑以答災譴三月三關別將李世哲大破羣蠻斬蕭衍龍驤將軍文思之文天生夏四月青州民飢辛巳開倉賑恤乙巳上御申訟車親理冤訟六月南荊州刺史桓叔興大破蕭衍軍於九山斬其虎旅將軍新豐縣開國子蔡合孫冠軍將軍席世興貞義將軍藍次孫秋七月丙子勿吉國遣使朝貢八月甲申帝臨朝堂考百司而加黜陟九

月吐谷渾契丹勿吉諸國僉遣使朝貢冬十月庚辰詔
驍騎將軍馬義舒慰諭蠕蠕庫莫奚國遣使朝貢十有
一月庚戌南天竺佐越費實諸國僉遣使朝獻辛亥詔
司徒高肇爲大將軍平蜀大都督步騎十五萬西伐益
州刺史傅豎眼出巴北平南將軍羊祉出涪城安西將
軍奚康生出綿竹撫軍將軍甄琛出劔閣乙卯以中護
軍元遙爲征南將軍東道都督鎮邊梁楚丁巳幽州沙
門劉僧紹聚衆反自號淨居國明法王州郡捕斬之甲
戌高麗國遣使朝獻十有二月庚寅詔立明堂

四年春正月甲寅帝不豫丁巳崩于式乾殿時年三十

三二月甲戌朔上尊諡曰宣武皇帝廟號世宗甲午葬景陵帝幼有大度喜怒不形於色雅性儉素初高祖欲觀諸子志尙乃大陳寶物任其所取京兆王愉等皆競取珍玩帝唯取骨如意而已高祖大奇之庶人恂失德高祖謂彭城王勰曰吾固疑此兒有非常志相今果然矣乃立爲儲貳雅愛經史尤長釋氏之義每至講論連夜忘疲善風儀美容貌臨朝淵嘿端嚴若神有人君之量矣

史臣曰世宗承聖考德業天下想望風化垂拱無爲邊徼稽服而寬以攝下從容不斷太和之風替矣比夫漢

世元成安順之儔歟

魏書卷八

魏書卷八考證

世宗紀太和七年閏四月生帝於平城宮。臣人龍按

歷代甲子圖魏太和七年歲在癸亥閏月魏子恂生
本書高祖紀閏月癸丑皇子生亦謂恂也此云閏四
月生則宣武帝實與廢太子恂生爲同月